



和  
687  
2







Handwritten mark or characters on the right page.



禱言  
子  
一

Handwritten mark or characters at the top of the left page.



詩宗子集卷一

襟言 一百一十九首

巾拂銘

唐堯



戰戰慄慄日謹一日人莫蹟於山而蹟於垤

擊壤歌

佚名氏

壤以木為之長三四寸形如履古戲

日出而作日入而息鑿井而飲耕田而食帝力何有於我哉

箕山歌

許由

許由以清節約聞堯乃遣使禪為天子由喟



言分  
然歎曰匹夫結志固如磐石采山飲河所以  
養性非以貪天下也堯既祖落乃作歌

登彼箕山兮瞻望天下山川麗崎萬物還普日月運  
照靡不記覩游放其間何所却慮嘆彼唐堯獨自愁  
苦勞心九州憂勤后土謂予欽明傳禪易祖我樂何  
如蓋不眴顧河水流兮緣高山甘瓜施兮葉絲鬻高  
林肅兮相錯連居此之處傲堯君

南風歌

虞舜

南風之薰兮可以解吾民之愠兮南風之時兮可以  
阜吾民之財兮

南風操

有黃龍兮出自於海按圖觀讖兮閔天嗟嗟

襄陵操

夏禹

禹治洪水上會稽山顧而作此歌

嗚呼洪水滔天下民愁悲上帝愈咨三過吾門不入  
父子道衰嗟嗟不欲煩下民

麥秀歌

箕子

麥秀漸漸兮禾黍油油彼狡童兮不與我好兮

採薇歌

伯夷叔齊

登彼西山兮採其薇矣以暴易暴兮不知其非矣神



農虞夏忽焉沒兮我安適歸矣吁嗟殂兮命之衰矣

盥盤銘

周武王

與其溺於人也寧溺於淵溺於淵猶可游也溺於人不可救也

杖銘

惡乎危於忿寔惡乎失道於嗜欲惡乎相忘於富貴

几銘

皇皇唯敬口口生垢口戕口

虞箴

佚名氏

周辛甲武王太史命百官箴王闕虞人箴曰

芒芒禹迹畫為九州經啓九道民有寢廟獸有茂草各有攸處德用不擾在帝夷羿冒于原獸忘其國恤而患麇社武不可重用不悛于夏家獸臣司原敢告僕夫

金滕流言詩

管叔蔡叔

嗟彼鳳騶羽短身孤初鳴高崗鷓鴣在傍周公危社稷主幼實場傷

伊耆氏蜡辭

佚名氏

土反其宅水歸其壑昆蟲母作草木歸其澤

履霜操

尹伯奇



尹吉甫繼室生伯封欲立之給吉甫曰伯奇  
 好妾若不信隱觀之實蜂領中顧伯奇曰蜂  
 螫我為掇之吉甫望見為然乃放伯奇伯奇  
 清朝履霜踐草自傷無罪見逐而作乃援琴  
 而歌曲終投河死

朝履霜兮採晨寒考不明其心兮信讒言孤恩離別  
 兮摧肺肝何辜皇天兮遭斯愆痛沒不同兮恩有偏  
 誰說碩兮知此冤

柳下惠誄

門人將誄妻曰將誄夫子之德耶則不如妾

柳下惠妻

知之也

夫子不伐兮夫子之不竭兮夫子之信誠而與人無  
 害兮柔屈從俗不強察兮蒙恥救民德彌大兮雖遇  
 三黜終不弊兮豈弟君子永能厲兮嗟呼惜哉乃下  
 世兮庶幾遐年今遂逝兮嗚呼哀哉鬼神泄兮夫子  
 之謚宜為惠兮

琴歌〇一云履屨歌

百里奚妻

百里奚為秦相堂上樂作所賃瀚婦自言知  
 音因援琴而歌問之乃其故妻還為夫婦

百里奚五羊皮憶別時烹伏雞炊履屨今日富貴忘



我為

百里奚百里奚母已死葬南谿墳以瓦覆以柴春黃  
藜搯伏雞西入秦五殺皮今日富貴捐我為

舟之僑歌

舟之僑

晉文公出亡僑去虞從焉反國爵之僑不與  
焉乃歌遂去

有龍矯矯頃失其所一蛇從之周流天下龍返其淵  
安寧其所一蛇者乾獨不得其所

彈歌

陳音

越王欲謀復吳范蠡進善射者陳音越王問

曰孤聞子善射道何所生音曰臣聞弩生于  
弓弓生于彈彈起于古之孝子不忍見父母  
為禽獸取食故作彈以守之

斷竹續竹飛土逐宍

漁父歌

楚漁父

伍員奔吳江有漁父欲渡之因歌

日月昭昭乎澗已馳與子期乎蘆之漪

日已夕兮予心憂悲月已馳兮何不渡為事澗急兮  
將奈何

越謠歌

失名氏



越俗初與人交有禮封土壇祭以犬雞祝曰  
天地父母某月某日甲與乙為友善上下四旁莫不  
並見君乘車我戴笠他日相逢下車揖君擔簦我跨  
馬他日相逢為君下

越人歌

失名氏

鄂君子皙楚王母弟也泛舟於新波之中乘  
青翰之舟張翠蓋會鐘鼓之音越人擁楫而  
歌於是鄂君乃舉繡被而覆之

今夕何夕兮搴洲中流今日何日兮得與王子同舟  
蒙羞被好兮不訾詬恥心幾煩而不絕兮得知王子

山有木兮木有枝心說君兮君不知

鼎銘

宋正考父

一命而僂再命而偃三命而俯循牆而走亦莫予敢  
侮匱於是粥於是糊子口

蟋蟀歌

孔子

遠山十里蟋蟀之聲猶尚在耳

曳杖歌

泰山其頽乎梁木其壞乎哲人其萎乎

去魯歌

彼婦之口可以出走彼婦之謁可以死敗蓋優哉游



言集  
二二集  
哉聊以卒歲

鳳兮歌

楚狂接輿

人間世云鳳兮鳳兮何如德之衰也來世不可待往世不可追也天下有道聖人成焉天下無道聖人生焉方今之時僅免刑焉福輕乎羽莫之知載禍重乎地莫之知避已乎已乎臨人以德殆乎殆乎畫地而趨迷陽迷陽無傷吾行吾行卻曲無傷無足山木自寇也膏火自煎也桂可食故伐之漆可用故割之人皆知有用之用而莫知無用之用也

鳳兮鳳兮何德之衰往者不可諫來者猶可追已而已而今之從政者殆而

孺子歌○一名滄浪歌

佚名氏

滄浪之水清兮可以濯我纓滄浪之水濁兮可以濯我足

成人歌

佚名氏

成有兄死不為衰者聞高子臯為成宰遂為衰成人歌曰

蠶則績而蟹有匡范則冠而蟬有綏兄則死而子臯為之衰



忠歸歌

楚王子

楚王子質於秦思歸而作

洞庭兮木秋洛陽兮草衰去千乘之家國作咸陽之布衣

萍實謠

失名氏

楚王渡江得萍實大如斗赤如日剖而食之甘如蜜

黃鵠歌

魯陶嬰

陶嬰者陶明之女少寡養孤幼無彊昆弟紡績為產或聞其義將求焉嬰聞之恐不免作歌以明志

悲夫黃鵠之早寡兮七年不雙宛頸獨宿兮不與眾同夜半悲鳴兮想其故雄天命早寡兮獨宿何傷寡婦念此兮泣下數行嗚呼哀哉兮死者不可忘飛鳥尚然兮况於貞良雖有賢雄兮終不同行

大言賦

楚襄王

襄王與唐勒宋玉遊陽雲之臺曰能為大言賦者上座

操是太阿戮一世流血冲天車不可以厲

大言賦

唐勒

壯士難兮絕天維北斗戾兮太山夷



小言賦

襄王既命諸大夫為大言賦又曰有能為小言賦者賜之雲夢之田

折飛糠以為輿剖糝糟以為舟憑螭皆以顧眄附蟻

蠓而遐遊館于蠅鬢宴于毫端烹蝨胃切蟻肝會九族而同齋猶委餘而不殫

大言賦

宋玉

方地為車圓天為蓋長劔耿介倚天外并吞四夷飲枯河海跋越九州無所容止

小言賦

無內之中微物潛生比之無象言之無名蒙蒙景滅昧昧遺形纖於蠶末之微蔑陋於茸毛之方生視之則眇眇望之則冥冥離朱為之歎悶神明不能察其情二子之言磊磊皆不小何如此之為精

小言賦

景差

戴氛埃兮乘剽塵體輕蚊翼形微蚤鱗經由鍼孔出入羅巾

侘詩

荀况

天下不治請陳侘詩天地易位四時易鄉列星隕墜



言宗  
二子集  
旦暮晦盲幽闇登昭日月下藏公正無私反見縱橫  
志愛公利重樓疏堂無私罪人懲革二兵道德純備  
讒口將將仁人紂約赦暴擅強天下幽險恐失世英  
螭龍為蟻蜥鴟梟為鳳凰比干見剗孔子拘匡昭昭  
乎其知之明也郁郁乎其遇時之不祥也拂乎其欲  
禮義之大行也闇乎天下之晦盲也皓天不復憂無  
疆也千秋必反古之常也弟子勉學天不忘也聖人  
共手時幾將矣與愚亦疑願聞反辭其小歌也念彼  
遠方何其塞矣仁人紂約暴人行矣忠臣危殆讒人  
般矣璇玉瑤珠不知珮也雜布與錦不知異也閭媿

子奢莫之媒也嫫母刀父是之喜也以盲為明以聾  
為聰以危為安以吉為凶嗚呼上天曷維其同

牟子引古語

佚名氏

少所見多所怪見橐駝言馬腫背

渡易水歌

荆軻

風蕭蕭兮易水寒壯士一去兮不復還

列女傳引古語

佚名氏

力田不如遇豐年力桑不如見國卿刺繡文不如倚  
市門

紫芝歌○一云四皓歌

商山四皓



莫莫高山溪谷逶迤曄曄紫芝可以療飢唐虞世遠  
吾將何歸駟馬高蓋甚憂其大富貴之畏人不如貧  
賤之肆志

功臣封爵誓

高皇帝

使黃河如帶泰山若礪國以永存爰及苗裔

春歌○一云永巷歌

戚夫人

高帝初幸戚姬生如意惠帝立呂后囚戚夫  
人永巷髡鉗衣赭衣令春戚夫人春且歌后  
聞之大怒曰乃欲倚女子耶誅趙王遂遭人  
彘之禍

子為王母為虜終日春薄暮常與死為伍相離三千  
里當誰使告汝

淮南謠

失名氏

一尺布尚可縫一斗粟尚可春兄弟二人不相容

李夫人歌

武帝

漢武追念李夫人方士言能致其神夜祭見  
好女如夫人之貌步幄坐帝愈益悲為作歌  
是耶非耶立而望之翩何姍姍其來遲

落葉哀蟬曲

帝思懷李夫人汎舟昆靈池使女伶歌之時



日已西傾涼風激水因賦此

羅袂兮無聲玉墀兮塵生虛房冷而寂寞落葉依於  
重扇望彼美之女兮安得感余心之未寧

瓠子歌

瓠子波兮將奈何浩浩洋洋兮慮殫為河殫為河兮  
地不得寧功無已時兮吾山平吾山平兮鉅野溢魚  
弗鬱兮柏冬日正道弛兮離常流蛟龍騁兮放遠遊  
歸舊川兮神哉沛不封禪兮安知外為我謂河伯兮  
何不仁泛濫不止兮愁吾人齧桑浮兮淮泗滿久不  
返兮水維緩

河湯湯兮激潺湲北渡回兮迅流難褰長筵兮湛美  
玉河伯許兮薪不屬薪不屬兮衛人罪燒蕭條兮噫  
乎何以禦水隕林竹兮榘石菑宣防塞兮萬福來

北方佳人歌

李延年

北方有佳人絕世而獨立一顧傾人城再顧傾人國  
寧不知傾城與傾國佳人難再得

悲歌行

佚名氏

悲歌可以當泣遠望可以當歸思念故鄉鬱鬱纍纍  
欲歸家無人欲渡河無船心思不能言腸中車輪轉  
戰城南○鏡歌

佚名氏



戰城南死郭北野死不葬烏可食爲我謂烏且爲客  
豪野死諒不葬腐肉安能去子逃水溪激激蒲葦冥  
冥梟騎戰鬪死駑馬徘徊鳴梁築室何以南何以北  
禾黍不穫君何食願爲忠臣安可得忠子良臣良臣  
誠可忠朝行出攻暮不夜歸

上陵○鏡歌

佚名氏

上陵何美美下津風以寒問客從何來言從水中央  
桂樹爲君船青絲爲君竿木蘭爲君櫂黃金錯其間  
滄海之雀赤翅鴻白鴈隨山林乍開乍合曾不知日  
月明醴泉之水光澤何蔚蔚芝爲車龍爲馬覽遨遊

四海外甘露初二年芝生銅池中仙人下來飲延壽  
千萬歲

有所思○鏡歌

佚名氏

有所思乃在大海南何用問遺君雙珠玳瑁簪用玉  
紹繚之間君有他心拉襍摧燒之摧燒之當風揚其  
灰從今已往勿復相思相思與君絕雞鳴犬吠兒姪  
當知之妃呼豨秋風肅肅晨風颺東方須臾高知之

臨高臺○鏡歌

佚名氏

臨高臺以軒下有清水清且寒江有香草日以蘭黃  
鵠高飛離哉翻關弓射鵠令我主壽萬年收中吾



烏生

失名氏

烏生八九子端坐秦氏桂樹間  
嗒我秦氏家有遊遨  
蕩子工用睢陽彊蘇合彈  
左手持彊彈兩丸出入烏  
東西嗒我一丸即發中烏身  
烏死魂魄飛揚上天阿  
母生烏子時乃在南山巖石間  
嗒我人民安知烏子  
處蹊徑窈窕安從通白鹿  
乃在上林西苑中射工尚  
復得白鹿脯嗒我黃鵠摩天極  
高飛後宮尚復得烹  
煮之鯉魚乃在洛水溪淵中  
釣鉤尚得鯉魚口嗒我  
人民生各各有壽命  
死生何須復道前後

孤兒行

失名氏

孤兒生孤子遇生命當獨苦  
父母在時乘堅車駕駟  
馬父母已去兄嫂令我行  
賈南到九江東到齊與魯  
臘月來歸不敢自言苦  
頭多蟣蝨面目多塵大兄言  
辨飯大嫂言視馬上高堂  
行取殿下堂孤兒淚下如  
雨使我朝行汲暮得水來歸  
手爲錯足下無菲愴愴  
履霜中多蒺藜拔斷蒺藜腸  
肉中愴欲悲淚下漑漑  
清涕纍纍冬無複襦夏無單衣  
居生不樂不如早去  
下從地下黃泉春氣動草萌芽  
三月蠶桑六月收瓜  
將是瓜車來到還家瓜車反覆  
助我者少啗瓜者多  
願還我孳兄與嫂嚴獨且急歸  
當與校計亂曰里中



言宗  
一何譏譏願欲寄尺書將與地下父母兄嫂難與久居

上之回

佚名氏

上之回所中益夏將至行將北以承甘泉宮寒暑德  
遊石關望諸國月支臣匈奴服令從百官疾驅馳千  
秋萬歲樂無極

君馬黃

佚名氏

君馬黃臣馬蒼二馬同逐臣馬良易之有騄蔡有赭  
美人歸以南駕車馳馬美人傷我心佳人歸以北駕  
車馳馬美人安終極

聖人出

佚名氏

聖人出陰陽和美人出遊九河佳人來駢離我何駕  
六飛龍四時和君之臣明護不道美人哉宜天子免  
甘星巫樂甫始美人子含四海

上邪○一曰上雅

佚名氏

上邪我欲與君相知長命無絕衰山無陵江水為絕  
冬雷震震夏雨雪天地合乃敢與君絕

封禪頌

司馬相如

自我天覆雲之油油甘露時雨厥壤可游滋液滲漉  
何生不育嘉穀六穗我穡曷蓄非唯雨之又潤澤之



非惟徧之我泥布濩之萬物熙熙懷而慕思名山顯  
位望君之來君乎君乎侯不邁哉般般之歎樂我君  
圃白質黑章其儀可嘉眈眈穆穆君子之態蓋聞其  
聲今親其來厥塗靡從天瑞之徵茲亦於舜虞氏以  
興濯濯之麟遊彼靈時孟冬十月君徂郊祀馳我君  
輿帝用享社三代之前蓋未嘗有宛宛黃龍興德而  
升采色炫燿煥炳輝煌正陽顯見覺悟黎烝於傳載  
之云受命所乘厥之有章不必諄諄依類託寓諭以  
封巒

與相如書

卓文君

相如欲妾茂陵女文君作白頭吟自絕又作  
此與之

朱絃斷明鏡缺朝露晞芳顏歌白頭吟傷離別努力  
加餐毋念妾錦水湯湯與君長設

誄相如

嗟嗟夫子兮亶通儒少好學兮綜羣書縱橫劔技兮  
英敏有譽尚慕往哲兮更名相如落魄遠遊兮賦子  
虛畢爾壯志兮駟馬高車憶初好兮雍容孔都憐才  
仰德兮琴心兩娛承托為妃兮不恥當壚平生淺促  
兮命也難扶長夜息君兮形影孤步中庭兮霜草枯



鴈鳴哀哀兮吾將安如仰天太息兮抑鬱不舒訴此  
淒惻兮疇忍聽余泉穴可從兮願捐其軀

天地○郊祀歌

佚名氏

天地並况唯予有慕爰熙紫壇忠求厥路恭承禮祀  
緼豫爲紛黻繡周張承神至尊千童羅舞成八溢合  
好効歡虞泰一九歌畢奏斐然殊鳴琴竽瑟會軒朱  
璆磬金鼓靈其有喜百官濟濟各敬其事盛牲實俎  
進聞膏神奄畱臨須搖長麗前揆光耀明寒暑不忒  
况皇章展詩應律琯玉鳴函宮吐角激徵清發梁揚  
羽申以商造茲新音永久長聲氣遠條鳳鳥鵠神夕

奄虞蓋孔享

天門○郊祀歌

佚名氏

天門開談蕩蕩穆竝騁以臨饗光夜燭德信著靈寢  
平而鴻長生豫大朱涂廣夷石爲堂飾玉梢以舞歌  
體招搖若永望星畱愈塞隕光照紫幄珠煩黃幡比  
玃回集貳雙飛常羊月穆穆以金波日華耀以宣明  
假清風軋忽激長至重觴神衷回若畱放殮冀親以  
肆章函蒙祉福常若期寂寥上天知厥時泛泛滇滇  
從高旂殷勤此路臚所求佻正嘉吉弘以昌休嘉辟  
隱溢四方專精厲意逝九閼紛紜六幕浮大海



景星○郊祀歌

失名氏

一曰寶鼎歌元鼎元年得寶鼎而作

景星顯見信星彪列象載昭庭日親以察參侔閭闔  
爰推本紀汾睢出鼎皇祐元始五音六律依韋饗昭  
雜變竝會雅星遠姚空桑瑟瑟結信成四興遞代八  
風生殷殷鐘石羽籥鳴河龍供鯉醇犧牲百末旨酒  
布蘭生泰尊柘漿析朝醒微感心攸通修名周流常  
羊息所并穰穰復正直往甯馮蠡切和疏寫平上天  
布施后土成穰穰豐年四時榮

拊缶歌

楊惲

田彼南山蕪穢不治種一頃豆落而為箕人生行樂  
耳須富貴何時

武溪操

馬援

馬援征南時有門生袁寄生善吹笛援和作  
歌

滔滔武溪一何深鳥飛不渡獸不敢臨嗟哉武溪兮  
多毒淫

古歌

失名氏

上金殿著玉樽延貴客入金門入金門上金堂東廚  
具肴膳椎牛烹豬羊主人前進酒彈瑟為清商投壺



言宗  
對彈碁博奕並復行朱火颺煙霧博山吐微香清樽  
發朱顏四坐樂且康今日樂相樂延年壽千霜

滿歌行○大曲

失名氏

為樂未幾時遭時嶮巖逢此百離伶仃荼毒愁苦難  
為遙望極辰天曉月移憂來填心誰當我知戚戚多  
患慮耿耿殊不寧禍福無形惟念古人遜位躬畊遂  
我所願以茲自寧自鄙棲棲守此末榮莫秋烈風昔  
蹈滄海心不能安攬衣瞻夜北斗闌干星漢照我去  
自無他奉事二親勞心可言窮達天為智者不愁多  
為少憂安貧樂道師彼莊周遺名者貴子遐同遊選

者二賢名垂千秋飲酒歌舞樂復何須照視日月日  
月馳驅軼軻人間何有何無貪財惜費此一何愚鑿  
石見火居代幾時為當歡樂心得所喜安神養性得  
保遐期

鮑氏驄

失名氏

鮑宣宣子永永子昱三世皆為司隸乘一驄  
馬京師歌之

鮑氏驄三入司隸再入公馬雖瘦行步工

匈奴歌

失名氏

失我焉支山令我婦女無顏色失我祁連山令我六



畜不蕃息

五噫歌

梁鴻

陟彼北邙兮噫願瞻帝京兮噫宮闕崔嵬兮噫民之  
劬勞兮噫遑遑未央兮噫

盤中詩

蘇伯玉妻

山樹高鳥鳴悲泉水溪鯉魚肥空倉雀常苦饑吏人  
婦會夫希出門望見白衣謂當是而更非還入門中  
心悲北上堂西入堦急機絞杼聲催長歎息當語誰  
君有行妾念之出有日還無期結巾帶長相患君忘  
妾未知之妾忘君罪當治妾有行宜知之黃者金白

者玉高者山溪者谷姓者蘇字伯玉人才多智謀足  
家居長安身在蜀何惜馬蹄歸不數羊肉千斤酒百  
斛令君馬肥麥與粟今時人知四足與其書不能讀  
當從中央周四角

顧曲語

失名氏

周瑜精於音律雖三爵之後有關誤瑜必顧  
故時人云

曲有誤周郎顧

夜歌

失名氏

打殺長鳴雞彈去烏白鳥願得連冥不復曙一年都

詩宗

二子集

二十

晉

吳



一曉

雜言

傅玄

雷隱隱感妾心傾耳清聽非車音

女史箴

張華

懼后族之盛而作

茫茫造化二儀既分散氣流形既陶既甄在帝庖義  
肇經天人爰始夫婦以及君臣家道以正王猷有倫  
婦德尚柔含章貞吉婉嫕淑慎正位居室施衿結縵  
虔恭中饋肅慎爾儀式瞻清懿樊姬感莊不食鮮禽  
衛女矯桓耳忘和音志厲義高而二主易心玄熊攀

檻馮媛趨進夫豈無畏知死不恡班妾有辭割驪同  
輦夫豈不懷防微慮遠道罔隆而不殺物無盛而不  
衰日中則昃月滿則微崇猶塵積替若駭機人咸知  
飾其容而莫知飾其性性之不飾或愆禮正斧之藻  
之克念作聖出其言善千里應之苟違斯義則同衾  
以疑夫出言如微而榮辱由茲勿謂幽昧靈監無象  
勿謂玄漠神聽無響無矜爾榮天道惡盈無恃爾貴  
隆隆者墜鑿于小星戒彼攸遂比心螽斯則繁爾類  
驩不可以黷寵不可以專專實生慢愛極則遷致盈  
必損理有固然美者自美翩以取尤冶容求好君子



言宗  
所歸結恩而絕職此之由故曰翼翼矜矜福所以興  
靖恭自忠榮顯所期女史司箴敢告庶姬

宛轉歌

劉妙容

月既明西軒琴復清寸心斗酒爭芳夜千秋萬歲同  
一情歌宛轉宛轉淒以哀願爲星與漢形影共徘徊

團扇郎歌

謝芳姿

中書令王珉捉白團扇與嫂婢謝芳姿愛甚  
篤嫂撻婢過苦王東亭聞而止之芳姿善歌  
嫂令歌一曲當赦之應聲歌曰白團扇辛苦  
五流連是郎眼所見珉聞之更問汝歌何遺

芳姿卽改云云後人因而歌之

白團扇顛顛非昔容羞與郎相見

歸去來辭

陶潛

歸去來兮田園將蕪胡不歸旣自以心爲形役奚惆  
悵而獨悲悟已往之不諫知來者之可追寔迷途其  
未遠覺今是而昨非舟遙遙以輕颺風飄飄而吹衣  
問征夫以前路恨晨光之熹微乃瞻衡宇載欣載奔  
僮僕歡迎稚子候門三逕就荒松菊猶存攜幼入室  
有酒盈樽引壺觴以自酌眴庭柯以怡顏倚南牕以  
寄傲審容膝之易安園日涉以成趣門雖設而常關



策扶老以流憩時矯首而遐觀雲無心而出岫鳥倦  
飛而知還景翳翳以將入撫孤松而盤桓歸去來兮  
請息文以絕遊世與我而相違復駕言兮焉求悅親  
戚之情話樂琴書以消憂農人告余以春及將有事  
於西疇或命巾車或棹孤舟既窈窕以尋壑亦崎嶇  
而經丘木欣欣以向榮泉涓涓而始流羨萬物之得  
時感吾生之行休已矣乎寓形宇內復幾時曷不委  
心任去留胡爲乎遑遑兮欲何之富貴非吾願帝鄉  
不可期懷良辰以孤往或植杖而耘耔登東臯以舒  
嘯臨清流而賦詩聊乘化以歸盡樂夫天命復奚疑

詩一首

劉侯

城上草植根非不高所恨風霜早

臨江王節士歌

陸厥

木葉下江波連秋月照浦雲歇山秋思不可裁復帶  
秋風來秋風來已寒白露驚羅紈節士慷慨髮衝冠  
彎弓挂若木長劍竦雲端

獨酌謠

沈炯

獨酌謠獨酌復長謠智者不我顧愚夫予未要不愚  
復不智誰當予見招所以成獨酌一酌傾一瓢生涯  
本漫漫神理暫超超再酌驚許史三酌傲松喬頻煩

詩宗

卷之三

三



四五酌不覺凌丹霄倏爾厭五鼎俄然賤九韶彭殤  
無異葬夷跖可同朝龍蠖非不屈鵬鷃但逍遙寄語  
號呶侶無乃太塵囂

勅勒歌

斛律金

神武帝攻周屢敗勉坐安衆使斛律金唱勅

勅神武和之

勅勒川陰山下天似穹廬籠蓋四野天蒼蒼野茫茫  
風吹草低見牛羊

東征歌

王通

我忠國家兮遠遊京畿忽逢帝王兮降禮布衣遂懷

齊北

隋

唐

古人之心兮將興太平之基時異事變兮志乖願違  
吁嗟道之不行兮垂鞭東歸皇之不斷兮將身西飛

憶秦娥

李白

簫聲咽秦娥夢斷秦樓月秦樓月年年柳色灞陵傷  
別樂遊原上清秋節咸陽古道音塵絕音塵絕西風  
殘照漢家宮闕

公無渡河

黃河西來沒崑崙咆哮萬里觸龍門波滔天堯咨嗟  
大禹理百川兒啼不窺家殺湍湮洪水九州始蠶麻  
其害乃去茫然風沙披髮之變狂而癡清晨臨流欲



言完  
二子集  
奚爲旁人不惜妻止之公無渡河苦渡之虎可搏河  
難憑公果溺死流海潛有長鯨白齒若雪山公乎公  
乎挂冑於其間筮簒所悲竟不還

獨漉篇

獨漉水中泥水濁不見月不見月尚可水淡行人沒  
越鳥從南來胡鷹亦北渡我欲彎弓向天射惜其中  
道失歸路落葉別樹飄零隨風客無所托悲與此同  
羅幃舒卷似有人開明月直入無心可猜雄劍挂壁  
時時龍鳴不斷犀象繡澀苔生國恥未雪何由成名  
神鷹夢澤不顧鷓鴣爲君一擊鵬搏九天

鳴皋歌送岑徵君

若有人兮忠鳴皋阻積雪兮心煩勞洪河凌兢不可  
以逕度冰龍鱗兮難容舳邈仙山之峻極兮聞天籟  
之嘈嘈霜厓縞皓以合沓兮若長風扇海湧滄溟之  
波濤玄猿綠猨聒談峯岌危柯振石駭膽慄魄羣呼  
而相號峯崢嶸以路絕挂星辰於巖藪送君之歸兮  
動鳴皋之新作文鼓吹兮彈絲觴清冷之池閣君不  
行兮何待若反顧之黃鸝掃梁園之羣英振大雅於  
東洛巾征軒兮歷阻折尋幽居兮越巘嶠盤白石兮  
坐素月琴松風兮寂萬壑望不見兮心氛氳蘿冥冥



言宗  
不子集  
兮霰紛紛水橫洞以下淥波小聲而上聞虎嘯谷而  
生風龍藏谿而吐雲寡鶴清唳飢龜嘖呻魂獨處此  
幽默兮慙空山而愁人雞聚族而爭食鳳孤飛而無  
鄰螻蛄嘲龍魚目混珍嫫母衣錦西施負薪若使巢  
由桎梏於軒冕兮亦奚異乎夔龍蹙蹙於風塵哭何  
苦而救楚笑何誇而却秦吾誠不能學二子沽名矯  
節以耀世兮固將棄天地而遺身白鷗兮飛來長與  
君兮相親

夷則格上白鳩拂舞辭

鏗鳴鐘考朗鼓歌白鳩引拂舞白鳩之白誰與鄰霜  
衣雪襟誠可珍含哺七子能平均食不噎性安馴首  
農政鳴陽春天子刻玉杖鏤形賜耆人白鷺亦白非  
純真外潔其色心匪仁闕五德無司晨胡爲啄我葭  
下之紫鱗鷹鷂鷓鴣貪而好殺鳳凰雖大聖不願以  
爲臣

幽澗泉

拂彼白石彈吾素琴幽澗湫兮流泉溪善手明徽高  
張清心寂歷似千古松飈颺兮萬尋中見愁猿弔影  
而危處兮叫秋木而長吟客有哀時失志而聽者淚  
淋浪以沾襟乃戢商綴羽潺湲成音吾但寫聲發情



詩宗 于子集  
於妙指殊不知此曲之古今幽澗泉鳴溪林

上雲樂

金天之西白日所沒康老胡雛生彼月窟巉巖容儀  
戍削風骨碧玉炁炁雙目瞳黃金拳拳兩鬢紅華蓋  
垂下睫嵩嶽臨上脣不都詭譎貌豈知造化神大道  
是文康之嚴父元氣乃文康之老親撫頂弄盤古推  
車轉天輪云見日月初生時鑄冶火精與水銀陽烏  
未出谷顧兔半藏身女媧戲黃土團作愚下人散在  
六合間濛濛若沙塵生死了不盡誰明此胡是仙真  
西海栽若木東溟植扶桑別來幾多時枝葉萬里長

中國有七聖半路頽鴻荒陛下應運起龍飛入咸陽  
赤眉立盆子白水興漢光叱咤四海動洪濤爲簸揚  
舉足蹋紫微天闕自開張老胡感至德東來進仙倡  
五色師子九苞鳳皇是老胡雞犬鳴舞飛帝鄉淋漓  
颯沓進退成行能胡歌獻漢酒跪雙膝立兩肘散花  
指天舉素手拜龍顏獻聖壽北斗戾南山摧天子九  
九八十一萬歲長傾萬歲杯

贈徐中書望終南山歌

王維

晚下兮翠微悵塵事兮多違駐馬兮雙樹望青山兮  
不歸



魚山神女祠歌

坎坎擊鼓魚山之下吹洞簫望極浦女巫進紛屢舞  
陳瑤席湛清醑風淒淒兮夜雨神之來兮不來使我  
心兮苦復苦○右迎神曲

紛進拜兮堂前目眷眷兮瓊筵來不語兮意不傳作  
暮雨兮愁空山悲急管兮繁絃靈之駕兮儼欲旋倏  
雲收兮雨歇山青青兮水潄潄○右送神曲

送友人歸山歌

山寂寂兮無人又蒼蒼兮多木羣龍兮滿朝君何爲  
兮空谷文寡和兮思淡道難知兮行獨悅石上兮流

泉與松間兮草屋入雲中兮養雞上山頭兮抱犢神  
與棗兮如瓜虎賣杏兮收穀愧不才兮妨賢嫌既老  
兮貪祿誓解印兮相從何詹尹兮可卜

山中人兮欲歸雲冥冥兮雨霏霏水驚波兮翠管靡  
白鷺忽兮翻飛君不可兮寒衣山萬重兮一雲混天  
地兮不分樹晦曖兮氛氳損不見兮空聞忽山西兮  
夕陽見東臯兮遠村平蕪綠兮千里眇惆悵兮思君

補樂歌

元結

我有金石兮擊拊崇崇與我歌舞兮上帝之風由六  
合兮英華颯颯我有絲竹兮韻和泠泠與汝歌舞兮



上帝之聲由六合兮根柢羸羸

元化油油兮孰知其然至德汨汨兮順之以先元化  
泥泥兮孰知其然至道泱泱兮由之以全

漁父歌

張志和

西塞山前白鷺飛桃花流水鱖魚肥青箬笠綠蓑衣  
斜風細雨不須歸

望夫石○一作陳克詩字子高

王建

新野白河上有石如人相傳一婦送夫從戎  
別于此婦悵望久之遂化為石

望夫處江悠悠化為石不回頭山頭日日風和雨行

人歸來石應語

眎民詩

柳宗元

帝眎民情匪幽匪明慘或在腹已如色聲亦無動威  
亦無止力弗動弗止唯民之極帝懷民眎乃降明德  
乃生明翼明翼者何迺房迺杜惟房與杜實為民路  
迺定天子迺開萬國萬國既分迺釋蠹民迺學與仕  
迺播與食迺器與用迺貨與通有作有遷無遷無作  
士實蕩蕩農實董董工實蒙蒙賈實融融左右唯一  
出入唯同攝儀以引以遵以肆其風既流品物載休  
品物載休惟天子守乃二公之允唯天子明乃二公



言  
之成惟百辟正乃二公之令惟百辟穀乃二公之祿  
二公行矣弗敢憂縱是獲憂共二公居矣弗敢泰止  
是獲泰已既柔一德四夷是則四夷是則永懷不忒

拘幽操○琴操

韓愈

文王拘羑里作

目掩掩兮其凝其旨耳肅肅兮聽不聞聲朝不見日  
出兮夜不見月與星有知無知兮為死為生嗚呼臣  
罪當誅兮天王聖明

越裳操○琴操

周公作

雨之施物以孽我何意於彼為自周之先其艱其勤  
以有疆宇私我後人我祖在上四方在下厥臨孔威  
敢戲以侮孰荒于門孰治于田四海既均越裳是臣

將歸操○琴操

孔子之趙聞殺竇鳴犢作其曰翱翔于衛云  
云

狄之水兮其色幽幽我將濟兮不得其由涉其淺兮  
石齧我足乘其澗兮龍入我舟我濟而悔兮將安歸  
尤歸兮歸兮無與石鬪兮無應龍求

龜山操○琴操

詩

子集

三十



孔子以季桓子受齊女樂諫不從望龜山作  
其曰予欲望魯兮云云

龜之氛兮不能雲雨龜之枿兮不中梁柱龜之大兮  
祇以奄魯知將墮兮哀莫余伍周公有鬼兮嗟余歸  
輔

雉朝飛操○琴操

牧犢子七十無妻見雉雙飛感之而作

雉之飛于朝日羣雌孤雄意氣橫出當東而西當啄  
而飛隨飛隨啄羣雌粥粥嗟我雖人曾不如彼雉雞  
生身七十年無一妾與妃

別鵠操○琴操

商陵穆子娶妻五年無子父母欲其改娶其  
妻聞之中夜悲嘯穆子感而作

雄鵠銜枝來雌鵠啄泥歸巢成不生子大義嘗乖離  
江漢水之大鵠身鳥之微更無相逢日且可繞樹相  
隨飛

殘形操○琴操

曾子夢見一狸不見其首作

有獸維狸兮我夢得之其身孔明兮而頭不知吉凶  
何為兮覺坐而思巫咸上天兮識者其誰



柳州羅池廟詩

荔子丹兮蕉黃雜肴蔬兮進侯堂侯之船兮兩旗度  
中流兮風泊之待侯不來兮不知我悲侯乘駒兮入  
廟慰我民兮不嘖以笑鵝之山兮柳之水桂樹團團  
兮白石齒齒侯朝出遊兮暮來歸春與猿吟兮秋鶴  
與飛北方之人兮爲侯是非千秋萬歲兮侯無我違  
福我兮壽我驅厲鬼兮山之左下無苦濕兮高無乾  
稭稭充羨兮蛇蛟結蟠我民報祀兮無怠其始自今  
兮欽于世世

忽忽

忽忽乎余未知生之爲樂也願脫去而無因安得長  
翮大翼如雲生我身乘風振奮出六合絕浮塵死生  
哀樂兩相棄是非得失付閒人

月蝕詩

盧仝

新天子卽位五年歲次庚寅斗柄插子律調黃鐘森  
森萬木夜殭立寒氣鼻鼻頑無風爛銀盤從海底出  
出來照我茅屋東天色紺滑凝不流冰光交貫寒腫  
臃初疑白蓮花浮出龍王宮八月十五夜比並不可  
雙此時怪事發有物吞食來輪如壯士斧所壞桂似  
雪山風拉摧百鍊鏡照見膽平地埋寒灰火龍珠飛



出腦却入蚌蛤胎捷環破壁眼看盡當天一搭如煤  
食磨蹤滅跡須臾間復似萬古不可開不料至神物  
有此大狼狽星如撒沙出爭頭事光大奴婢炷暗燈  
揜葵如瑤瑁今夜吐燄長如虹孔隙千道射戶外玉  
川子涕泗下中庭獨自行念此日月者太陰太陽精  
皇天要識物日月乃化生走天汲汲勞四體與天作  
眼行光明此眼不自保天公行道何由行吾見陰陽  
家有說望日蝕月月光滅朔月掩日日光蝕兩眼不  
相攻此說吾不容又孔子師老子云五色令人目昏  
吾恐天似人好色則喪明幸此非春時萬物不嬌榮

青山破瓦色綠水冰崢嶸花枯無女豔鳥死沈歌聲  
頑冬何所好偏使一目盲又聞古老說蝕月蝦蟆精  
徑圓千里入汝腹如此癡騃阿誰生可從海窟來便  
解緣青冥恐是睚睫間指塞所化成黃帝有二月帝  
舜重瞳明二帝懸四目四海生光輝吾不遇二帝混  
莽不可知何故瞳子上坐受蟲豸欺長嗟白兔搗靈  
藥恰似有意防奸非藥成滿臼不中度委任白兔夫  
何爲憶昔堯爲天十日燒九州金爍水銀流玉燭丹  
砂焦六合烘爲窯堯心增百憂帝見堯心憂勃然發  
怒沒洪流立擬沃殺九日妖天高日走沃不及但見



萬國赤子穢穢生魚頭此時九御導九日爭持節幡  
麾幢旒駕車六九五十四頭蛟螭蛇掣電九火斬汝  
若蝕開齟齬輪御轡執索相肥鉤推蕩轟渴入汝喉  
紅鱗燄鳥燒口悒翎鬣倒側聲酸鄒撐腸拄肚礪傀  
如山邱自可飽死受不偷不獨填饑坑亦解堯心憂  
恨汝時當食藏頭揪腦不肯食不當食張唇哆嘴食  
不休食天之眼養逆命安得上帝請汝劉嗚呼人養  
虎被虎齧天媚篡被篡瞎乃知恩非類一一自作孽  
吾見患眼人必索良工設想天不異人愛眼固應一  
安得常娥氏來習扁鵲術手操捧喉戈去此睛上物

初既猶朦朧既又如抹漆但恐功業成復此不吐出  
玉川子又涕泗下心禱再拜額蹋沙土中地上蟣蝨  
臣全告愬帝天皇臣心有鐵一寸可剗妖篡癡腸上  
天不爲臣立梯磴臣血肉身無由飛上天揚天光封  
詞付與赤心風颭排闥闖入紫宮密通玉几前擘圻  
奏上臣全頑愚冒敢死橫干天代天謀其長東方蒼  
龍角插戟尾捩風當心開明堂統領三百六十鱗蟲  
坐理東方宮月蝕不救援安用東方龍南方火鳥赤  
潑血項長尾短飛跋躩頭戴丹冠高達栻月蝕鳥宮  
十三度鳥爲居停主人不覺察貪向何人家行赤口



毒舌毒蟲頭上喫却月不啄殺虛眩鬼眼明窺窬鳥  
罪不可雪西方攫虎立踣踣斧爲牙鑿爲齒偷犧牲  
食封豕大墓一齋固當輒美見似不見是何道理爪  
牙根天不念天天若准擬錯准擬北方寒龜被虵縛  
藏頭入殼如入殼蛇筋束緊束破殼寒龜夏鼈一種  
味且當雁其肉一底板沒信處惟堪支床脚不中鑽  
灼與天下卜歲星主福德官爵奉董秦忍使黔婁生  
覆尸無衣巾天失眠不弔歲星胡其仁熒惑矍鑠翁  
執法大不中月明無罪過不糾蝕月蟲年年十月朝  
太微支盧謫罰何災凶土星與土性相背反養福德

生禍害到人頭上死破敗今夜月蝕安可會太白眞  
將軍怒激鋒鏑生恆州陣斬鄴定進項骨脆甚春蔓  
菁天惟兩眼失一眼將軍何處行天兵辰星任廷尉  
天律自主持人命在盆底固應樂見天旨時天若不  
肯信試喚臯陶鬼一問一如今日三台文昌宮作上  
帝紀綱環天二十八宿磊落尚書郎整頓排班行劍  
握他人將一四太陽側一四天市傍操斧代天匠兩  
手不怕傷弧矢引滿反射人天狼呀喙明煌煌癡牛  
與駮女不肯勤農桑徒勞含淫患旦夕遙相望蚩尤  
簸旗弄旬朔始搥天鼓鳴璫琅枉矢能蛇行眊目森



森張天狗下舐地血流何滂滂譎險萬萬黨架構何  
可當眯目疊成就害我光明王請留北斗一星相北  
極指揮萬國懸中央此外盡掃除堆積如山岡贖我  
父母光當時常星沒隕雨如遊漿似天會事發叱喝  
誅姦強何故中道廢自遺今日殃善善又惡惡郭公  
所以亾願天神聖心無信他人忠玉川子詞訖風色  
緊格格近月黑暗邊有似動劔戟須臾癡暮精兩吻  
自沒拆初露半箇壁漸吐滿輪魄衆星盡原赦一墓  
獨誅磔腹肚忽脫落依舊挂穹碧光彩未蘇來慘淡  
一片白奈何萬里光受此吞吐厄再得見天眼感荷

天地力或問玉川子孔子修春秋二百四十年月蝕  
盡不收今子咄咄詞頗合孔意不玉川子笑答或請  
聽逗畱孔子父母魯諱魯不諱周書外書大惡故月  
蝕不見收余命唐天口食唐土唐禮過三唐樂過五  
小猶不說大不可數災沴無有小大瘡安引衰周研  
覈可否日分晝月分夜辨寒暑一主刑一主德政乃  
舉孰爲人面上一目偏可去願天完兩目照下萬方  
土萬古更不瞽萬萬古更不瞽照萬古

四禽言

梅堯臣

泥滑滑苦竹岡雨蕭蕭馬上郎馬蹄凌兢雨又急此



鳥為君應斷腸

婆餅焦兒不食爾父向何之爾母山頭化為石山頭  
化石可奈何遂作微禽啼不息

提壺蘆沽美酒風為賓樹為友山花撩亂目前開勸  
爾今朝千萬壽

不如歸去春山云暮萬木兮參雲蜀天兮何處人言  
有翼可歸飛安用空啼向高樹

白苧歌

戴復古

雪為緯玉為經一織三滌手織成一片冰清如夷齊  
可以為衣陟彼西山于以采薇

逸古

附三言二十五首

魯端門書

哀公十三年冬星孛東方有一郎言端門有  
血書子夏往見之血蟲鳥為帛鳥消書出署  
云演孔圖

趣作去聖人滅周姬亾彗東出秦政起胡破術書記  
轍孔不絕

黃玉文

孔子作孝經及春秋河雒成書備于天赤虹  
下化為黃玉長二尺上刻文云



寶文出劉季握卯金刀在軫北字季子天子服

古語

魯連子

心誠憐白髮玄情不怡豔色媼

農語

佚名氏

三月昏參星夕杏花盛桑葉白

河射角堪夜作犁星沒水生骨

里語

佚名氏

蜻蛉鳴衣囊成蟋蟀鳴嬾婦驚

漢初童謠

小兒歌之子房拜曰此東王公玉童也

漢

著青裙入天門捐金母拜木公

練時日○郊祀歌

佚名氏

練時日候有望炳管蕭延四方九重開靈之游垂惠  
恩鴻祐休靈之車結玄雲駕飛龍羽旄紛靈之下若  
風馬左蒼龍右白虎靈之來神哉沛先以雨般裔裔  
靈之至慶陰陰相放惠震澹心靈已坐五音飭虞至  
且承靈億牲繭栗粢盛香罇桂酒賓八鄉靈安畱吟  
青黃徧觀此眺瑤堂衆媵並綽奇麗顏如荼兆逐靡  
被華文廁霧縠曳阿錫佩珠玉俠嘉夜蒞蘭芳澹容  
與獻嘉觴



渥洼神馬歌

武帝

天馬來從西極涉流沙九夸服天馬來出泉水虎脊  
兩化若鬼天馬來歷無草徑千里循東道天馬來執  
徐時將搖舉誰與期天馬來開遠門竦予身逝昆侖  
天馬來龍之媒游閩闔觀玉臺

古五襍組詩

失名氏

五襍組岡頭草往復還車馬道不獲己人將老

匡衡歌

失名氏

衡字稚圭世農夫至衡好學家貧傭作以供  
資用尤精力過絕人諸儒為之語云

無說詩匡鼎來匡說詩解人頤

四重歌

失名氏

日重光月重輪星重輝海重潤

廉范歌

失名氏

廉叔度來何暮不禁火民安作昔無襦今五袴

京都謠

失名氏

順帝即世孝質短祚李固議立清河王梁冀  
貪樹疏幼徵蠡吾侯嗣位是為桓帝固是月  
幽斃于獄胡廣等皆封侯

直如弦死道邊曲如鉤反封侯



京兆謠

失名氏

李燮拜京兆吏民愛敬乃為此謠

我府君道教舉恩如春威如虎剛不吐柔不茹愛如母訓如父

相里謠

失名氏

文士傳留侯七世孫張讚字子卿居吳縣相人里時人云

相里張多賢良積善應子孫昌

邊韶語

失名氏

韶字孝先教授數百人嘗晝假臥弟子戲之

云云孝先聞即應曰邊為姓孝為字腹便便五經笥但欲眠忠經事寐與周公同夢靜與孔子同意師而可嘲出何典記譏者大慚邊孝先腹便便懶讀書但欲眠

天郊饗神歌

失名氏

整泰壇祀皇神精氣感百靈賓蘊朱火燎芳薪紫煙遊冠青雲神之體靡象形曠無方幽以清神之來光景照聽無聞視無兆神之至舉歌歌靈爽協動余心神之坐同歡娛澤雲翔化風舒嘉樂奏文中聲八音諧神是聽咸潔齋竝芬芳烹牲牲享玉觴神悅饗歌



宋

禮祀侑大晉降繁祉祚京邑行四海保天年窮地紀

將進酒

何承天

將進酒慶三朝備繁禮薦嘉肴榮枯換霜霧交緩春  
帶命朋僚車等旗馬齊鑣懷溫克樂林濠士矢志愠  
情勞忠旨酒寄遊遨敗德人甘醇醪耽長夜惑淫妖  
興屢舞厲哇謠形僂僂聲號呶首既濡志亦荒性命  
天國家亾嗟後生節酣觴匪酒辜孰為殃

代春日行

鮑照

獻歲發吾將行春山茂春日明園中鳥多嘉聲梅始  
發桃始青汎舟艫齊擢驚奏采菱歌鹿鳴微風起波

北魏

微生絃亦發酒亦傾入蓮池折桂枝芳袖動芬葉披  
兩相忠兩不知

李謚歌

佚名氏

謚初師事孔璠數季後璠還就謚請業同門  
生為語

唐

青成藍藍謝青師何常在明經

晉陽武○鏡歌

柳宗元

隋亂既極唐師起晉陽平姦豪為生人義主  
以仁興武故為晉陽武

晉陽武奮義威煬之渝德焉歸岷畢屠綏者誰皇烈

詩宗

卷一

四一



言宗  
烈專天機號以仁揚其旗日之升九土晞訢田圻流  
洪輝有其二翼餘隋斲梟驚連熊螭枯以肉勅者羸  
后土蕩玄穹彌合之育莽然施惟德輔慶無期

柳州龍城白石文

柳子厚守柳州築龍城得白石有刻

龍城柳神所守驅厲鬼山左首福土毗制九醜

憲銘

朱文公

言忠必動忠蹟過忠棄端爾躬正爾容一爾衷

詩宗子集卷一

宋

詩宗子集卷二

四言 一百五十三首

兵瀆

黃帝

日中不彗是謂失時操刀不割失利之期執斧不伐  
賊人將來涓涓不塞將為江河熒熒不救炎炎奈何  
兩葉不去將用斧柯為虺不推行將為蛇

五子之歌

虞舜

舜耕歷山時見鳴鳩嘔哺之狀而作歌蓋鳴  
鳩以禽獸之無知能知慈愛之情可以人而  
不如鳩之意

逸古



瞻彼鳴鳩徘徊下止徘徊下止思我父母

八伯歌

舜八伯

帝唱南風歌八伯咸進稽首而歌

明明上天爛然星陳日月光華弘于一人

卿雲歌

舜羣臣

舜將禪禹於是俊乂百工相和而歌

卿雲爛兮糾縵縵兮日月光華旦復旦兮

鑄鼎絃

夏禹

逢逢白雲一南一北一西一東九鼎既成遷于三國

哀慕歌

季歷

太王寢疾欲傳季歷泰伯虞仲去被髮文身  
託為王採藥後聞太王卒奔喪哭於門示夷  
狄之人不得入王庭季歷垂涕留之不肯止  
適吳季歷乃作此歌

先王既祖長實異都哀喪腹心未寫中懷追念伯仲  
我季如何梧桐萋萋生於道周宮館徘徊臺閣既除  
何為遠去使此空虛支骨離別垂患南隅瞻望荆越  
涕淚交流伯兮仲兮逝肯來遊自非二人誰訴此憂

文王操

周文王

時鳳凰銜書于郊乃作此歌



翼翼翔翔彼鳳凰兮銜書來遊以命昌兮瞻天案圖  
殷將亾兮蒼蒼之天始有萌兮五神連精合謀房兮  
興我之業望來羊兮

楹銘

周武王

母曰胡殘其既將然母曰胡害其既將大母曰胡傷  
其既將長

書井

原泉滑滑連旱則絕取事有常賦斂有節

書車

自致者急載人者緩取欲無度自致而反

白雲謠

西王母

乙丑天子觴王母於瑤池王母為天子謠

白雲在天山際自出道里悠遠山川間之將子無死  
尚復能來

答

周穆王

予歸東土和治諸夏萬民平均吾願見女比及三年  
將復而野

逸詩

失名氏

翹翹車乘招我以弓豈不欲往畏我友朋  
雖有絲麻無棄菅蒯雖有姬姜無棄蕉萃凡百君子



莫不代匱

采藥詩

韓終

閭河之桂實大如棗得而食之後天而老

龜山操

孔子

季桓子受女樂孔子諫不得退而望龜山作  
予欲望魯龜山蔽蔽手無斧柯奈龜山何

息鄒操

周道衰微禮樂陵遲文武既墜吾將焉歸周遊天下  
靡邦可依鳳凰不識珍寶臬鴟眷然顧之慘愁心悲  
中車命駕將適唐都黃河洋洋攸攸之魚臨津不濟

還轅息鄒傷予道窮哀彼無辜翱翔于衛復我故廬  
從吾所好其樂只且

槃操

乾澤而漁蛟龍不游覆巢毀卵鳳不翔雷慘予心悲  
還轅息鄒

猗蘭操

孔子歷聘諸侯莫能任自衛反魯隱谷之中  
見薝蘭獨茂喟然嘆曰蘭當為王者香今乃  
與眾草伍止車援琴鼓之

習習谷風以陰以雨之子于歸遠送于野何彼蒼天



不得其所逍遙九州無所定處時人闇蔽不知賢者  
年紀逝邁一身將老

丘陵操

魯哀公使幣如衛迎夫子而不能賞作此歌  
登彼山陵剝施其坂仁道在邇求之若遠遂迷不復  
自嬰屯蹇喟然迴慮題彼泰山鬱確其高粱南迴連  
枳棘充路陟之無緣將伐無柯患茲蔓延雜以永歎  
涕實潺湲

越羣臣祝

文種

越王勾踐五年與大夫種范蠡入臣於吳羣

臣送至浙江上臨水祖道大夫前爲祝

皇天佑助前沉後揚禍爲德根憂爲福堂威人者滅  
服從者昌王離牽致其後無殃君臣生離感動上皇  
衆夫悲哀莫不感傷臣請薄脯酒行二觴

大王德壽無疆無極乾坤受靈神祇輔翼我王厚之  
祉祐在側德銷百殃利受其福去彼吳庭來歸越國

紫玉歌

紫玉

吳王夫差小女名玉悅童子韓重欲嫁之不  
得結氣而死重遊學歸知之往弔於墓側玉  
形見顧重延頸而歌



南山有鳥北山張羅意欲從君讒言孔多悲結成疹  
沒命黃墟命之不造冤如之何羽族之長名爲鳳凰  
一日失雄三年感傷雖有衆鳥不爲匹雙故見鄙姿  
逢君輝光身遠心近何曾暫忘

烏鵲歌

韓憑妻

韓憑戰國時爲宋康王舍人妻何氏美王欲  
之捕舍人築青陵臺何氏作烏鵲可以見志  
遂自縊死

南山有鳥北山張羅鳥自高飛羅當奈何  
烏鵲雙飛不樂鳳凰妾是庶人不樂宋王

偕隱歌

祝牧

祝牧與其妻偕隱作此

天下有道我黻子佩天下無道我負子戴

田者祝

淳于髡

甌窶滿篝汙邪滿車五穀蕃熟穰穰滿家

上秦惠王詩

蘇秦

言語相結天下爲一合從連橫兵革不藏文士竝飭  
諸侯亂惑萬端俱起不可勝理科條旣備民多僞態  
書策稠濁百姓不足上下相愁民無所聊明言章理  
甲兵愈起辯言偉服戰攻不息繁稱文辭天下不治



言宗 不子集  
舌敝耳聾不見成功行義約信天下不親

古語

失名氏

眾人重利廉士重名賢士尚志聖人貴精

古語

失名氏

人不婚宦情欲失半人不衣食君臣道息

古語

失名氏

截社適履孰云其愚何與斯人追欲喪軀

鼓缶

失名氏

君子有酒小人鼓缶雖不見好亦不見醜

引聲歌

莊周

天地之道近在曾臆呼吸精神以養九德渴不求飲  
饑不索食處世守道志潔如玉卿相之位難可直當  
巖巖之石幽而清涼枕塊寢處樂在其央寒涼回固  
可以久長

鴻鵠歌○一作楚歌

高帝

鴻鵠高飛一舉千里羽翼已就橫絕四海橫絕四海  
又可奈何雖有矰繳將安所施

安世房中歌

唐山夫人

大孝備矣休德昭清高張四縣樂充宮庭芬樹羽林  
雲景杳冥金支秀華庶旄翠旌七始華始肅倡和聲

詩宗

八子集

七



神矣宴娛庶幾是聽

粥粥音送細坐人情忽承青玄熙事備成清息助助  
經緯冥冥

海內有茲紛亂東北詔撫成師武臣承德行樂交逆  
蕭勺羣慝肅為濟哉蓋定燕國

都荔遂芳宵宥桂華孝奏天儀若日月光燦玄四龍  
回馳北行羽旄殷盛芬哉芑芑孝道隨世我署文章  
磴磴卽卽師象山則嗚呼孝哉案撫戎國蠻夷竭歡  
象來致福兼臨是愛終無兵革

嘉薦芳矣告靈饗矣告靈既饗德音孔臧惟德之臧

建侯之常承保天休令問不忘

皇皇鴻明蕩侯休德嘉承天和伊樂厥福在樂不荒  
惟民之則浚則師德下民咸殖令問在舊孔容翼翼

耕田歌

朱虛侯章

諸呂用事劉章忿劉氏不得職嘗入侍宴請  
以軍法行酒酒酣章進飲歌舞請為畊田歌  
淡耕概種立苗欲疏非其種者鋤而去之

署門語

翟公

下邳翟公為廷尉賓客填門及罷門外可設  
雀羅後復用賓客欲往公大署其門曰



詩集 子集  
一死一生乃知交情一生一死乃知交態一貴一賤  
交情乃見

誠子詩

東方朔

明者處世莫尚于中優哉游哉於道相從首陽爲拙  
柳惠爲工飽食安步以仕代農依隱玩世詭時不逢  
才盡身危好名得華有羣累生孤貴失和遺餘不匱  
自盡無多聖人之道一龍一蛇形見神藏與龍變化  
隨時之宜無有常家

鄭白渠歌

佚名氏

穿渠引涇水注渭中溉田四千五百餘頃民

得其饒乃歌

田於何所池陽谷口鄭國在前白渠起後舉鍤如雲  
洩渠爲雨水流竈下魚跳入釜涇水一石其泥數斗  
且溉且糞長我禾黍衣食京師億萬之口

怨詩○一曰怨曠一曰患惟歌

王昭君

秋木萋萋其葉萎黃有鳥處山集于苞桑養育毛羽  
形容生光旣得升雲上遊曲房離宮絕曠身體摧藏  
志念抑沉不得頡頏雖得委養心有徬徨我獨伊何  
來往變常翩翩之燕遠集西羌高山峨峨河水泱泱  
父兮母兮道里悠長嗚呼哀哉憂心惻傷



自効詩

韋玄成

赫矣我祖侯于豕韋賜命建伯有殷以綏厥績既昭  
 車服有常朝宗商邑四牡翔翔德之令顯慶流于裔  
 宗周至漢羣后歷世肅肅楚傳德翼元夷厥駟有庸  
 惟慎惟祇嗣王孔佚越遷于鄒五世墮僚至我節侯  
 維我節侯顯德遐聞左右昭宣五品以訓既考致位  
 唯懿唯奐厥賜祁祁百金洎館國彼扶陽在京之東  
 唯帝是畱政謀是從釋繹六轡是列是理威儀濟濟  
 朝享天子天子穆穆是宗是師四方遐邇觀國之輝  
 茅土之繼在我俊兄唯我俊兄是讓是形於休厥德

於赫有聲致我小子不肅會同媿彼車服黜此附庸  
 赫赫顯爵自我隊之微微附庸自我招之誰能忍媿  
 寄之我顏誰將遐征從之夷蠻於赫三事匪俊匪作  
 於蔑小子終焉其度誰謂華高企其齊而誰謂德難  
 厲其庶而嗟我小子于貳其尤隊彼令聲申此擇辭  
 四方羣后我監我視威儀車服唯肅是履

逐貧賦

揚雄

揚子遁世離俗隱處左鄰崇山右接曠野鄰垣乞兒  
 終貧且窶禮薄義敝相與羣聚惆悵失志呼貧與語  
 汝在六極投棄荒遐好為庸卒刑戮是加匪惟幼穉



嬉戲土沙亦非近鄰接屋連家恩輕毛羽義薄綺羅  
進不由德退不受呵久爲滯客其意若何人皆文繡  
余褐不完人皆稻粱我獨藜藿貧無寶玩何以接歡  
宗室之宴爲樂不樂徒行負笈出處易衣身服百役  
手足胼胝或耘或耔霑體露肌朋友道絕達官凌遲  
厥咎安在職汝爲之舍汝遠竄崑崙之巔爾復我隨  
翰飛戾天舍爾登山巖穴隱蔽爾復我隨陟彼高岡  
舍爾入海汎彼柏舟爾復我隨載沉載浮我行爾動  
我靜爾休豈無他人從我何求今汝去矣勿復久留  
貧曰唯唯主人見逐多言益嗤心有所懷願得盡辭

昔我乃祖宣其明德克佐帝堯誓爲典則土堦茅茨  
匪離匪飾爰及季世縱其昏惑饕餮之羣貪富苟得  
鄙我先人乃傲乃驕瑤臺瓊室華屋崇高流酒爲池  
積肉爲嶠是用鵠逝不踐其朝三省吾身謂予無譽  
處君之所福祿如山忘我大德思我小怨堪寒能暑  
少而習焉寒暑不忒等壽神仙桀距不顧貪戾不干  
人皆重閉子獨露居人皆怵惕子獨無虞言辭既罄  
色厲目張攝齋而興降階下堂逝將去汝適彼首陽  
孤竹之子與我連行子乃避席辭謝不直請不貳過  
聞義則服長與爾居終無厭極貧遂不去與我遊息



詩宗 天子集

柞都夷歌

白狼王

益州刺史朱輔宣示漢德威懷遠夷歌頌

大漢是治與天合意吏譯平端不從我來聞風向化  
所見奇異多賜繒布甘美酒食昌樂肉飛屈伸悉備  
蠻夷貧薄無所報嗣願主長壽子孫昌熾○右遠夷  
樂德歌

蠻夷所處日入之部慕義向化歸日出主聖德深恩  
與人富厚冬多霜雪夏多和雨寒溫時適部人多有  
涉危歷險不遠萬里去俗歸德心歸慈母○右遠夷  
慕德歌

荒服之外土地境埒食肉衣皮不見鹽穀吏譯傳風  
大漢安樂攜負歸仁觸冒險狹高山岐峻緣崖礧石  
木薄發家百宿到洛父子同賜懷抱匹帛傳告種人  
長願臣僕○右遠夷懷德歌

古詩

陰長生

神僊傳云陰長生新人也博漢皇后之親屬  
從馬明生學度世之道後於丰都山中白日  
昇天長生臨仙去著書三篇以示將來  
維予之先佐命唐虞爰逮漢世紫艾重紓予獨好道  
而為匹夫高尚素志不事王侯貪生得生亦又何求

詩宗 天子集



詩宗  
子集  
超迹蒼霄乘飛駕浮青要承翼與我爲仇入火不灼  
蹈波不濡逍遙太極何慮何憂遊戲仙都顧憫羣愚  
年命之逝如彼波流奄忽未幾泥土爲儔馳走索死  
不肯暫休

予之聖師體道知真昇騰變化松喬爲鄰維予同學  
一十二人寒苦求道歷二十年中多怠惰志行不堅  
痛乎諸子命也自天天安妄投道必歸賢身投幽壤  
何時可還嗟爾將來勤加精研勿爲流俗富貴所牽  
神丹一成升彼九天壽同三光何但億千

維予垂髮少好道德棄家隨師東西南北委放五經  
辟世自匿二十餘年名山之側寒不遑衣飢不暇食  
患不敢歸勞不敢息奉事聖師承悅顏色面垢足胝  
乃敢哀識遂傳要訣恩深不測妻子延年咸享無極  
黃白既成貨財千億役使鬼神玉女侍側予得度世  
神丹之力

筮筮引○一曰公無渡河

麗玉

筮筮引者朝鮮津卒霍里子高妻麗玉所作  
也子高晨起行船有一白首狂夫被髮提壺  
亂流而渡其妻隨而止之不及遂墮河而死  
於是援筮筮而歌聲甚悽愴曲終亦投河而



死子高還語麗玉麗玉傷之乃引笙篴而寫  
其聲聞者莫不墮淚飲泣麗玉以其曲傳鄰  
女麗容名曰笙篴引

公無渡河公竟渡河墮河而死將奈公何

善哉行○瑟調曲

佚名氏

來日大難口燥唇乾今日相樂皆當喜歡經歷名山  
芝草翻翻仙人王喬奉藥一丸自惜袖短內手知寒  
慚無靈輒以報趙宣月落參橫北斗闌干親交在門  
饑不及餐歡日常少戚日苦多以何忘憂彈箏酒歌  
淮南八公要道不煩參駕六龍遊戲雲端○右章八

句六解

參同契後序

魏伯陽

鄙國鄙夫幽谷朽生挾懷朴素不樂權榮棲遲僻陋  
忽略利名執守恬淡希時安寧晏然間居乃撰斯文  
歌敘大易三聖遺言察其志趣一統共倫務在順理  
宣耀精神神化流通四海和平表以爲曆萬世可循  
序以御政行之不繁引內養性黃老自然含德之厚  
歸根返元近在我心不離己身抱一無捨可以長存  
配以服食雄雌設陳四物念護五行旋循挺除武都  
八石棄捐審用成物世俗所珍羅列三條枝莖相連



同出異名皆由一門非徒累句諧偶斯文殆有其真  
礫硤可觀使子敷偽却被贅愆命參同契微覽其端  
舜寡道大後嗣空遵委時去害依托丘山循遊寥廓  
與鬼爲隣化形而仙淪寂無聲百世一下遨遊人間  
敷陳羽翮東南西傾湯遭院際水旱隔併柯葉萎黃  
失其華榮各相乘負安穩長生

示桓麟詩

佚名氏

麟年十一能作詩賦客作詩示麟卽答之  
甘羅十二揚烏九齡昔有二子今則桓生

答客詩

桓麟

邈矣甘羅超等絕倫伊彼揚烏命世稱賢嗟予蠢弱  
殊才偉年仰慙二子俯媿過言

述志詩

仲長統

飛鳥遺跡蟬蛻亡殼騰蛇棄鱗神龍喪角至人能變  
達士拔俗乘雲無轡騁風無足垂露成幃張霄成幄  
沉澆當餐九陽代燭恆星豔珠朝霞潤玉六合之內  
恣心所欲人事可遺何爲局促  
大道雖夷見幾者寡任意無非適物無可古來繚繞  
委曲如瑣百慮何爲至要在我寄愁天上埋憂地下  
叛散五經滅棄風雅百家榘碎請用縱火抗志山棲



游心海左元氣爲舟微風爲柁翱翔太清從意容冶

古諺

失名氏

蓬生麻中不扶自直白沙在泥與之皆黑

古諺

失名氏

黨錮事起外黃令張升去官歸鄉道逢父老

植其杖云云

龍不隱鱗鳳不藏羽網羅高懸去將安所

郭有道碑文

蔡邕

於休先生明德通玄純懿淑靈受之自天崇壯幽浚  
如山如淵禮樂是悅詩書是敦匪惟撫華乃尋厥根

宮牆重仞允得其門懿乎其純確乎其操洋洋搢紳  
言觀其高棲遲泌丘善誘能教赫赫三事幾行其招  
委辭名貢保此清妙降年不永民斯悲悼爰勒茲銘  
摘其光耀嗟爾來世是則是效

古怨歌

竇玄妻

竇玄天子使出其妻妻以公主妻悲怨寄書  
及歌與玄其書曰棄妻斥女敬白竇生卑賤  
鄙陋不如貴人妾日以遠彼日以親何所控  
訴仰呼蒼旻悲哉竇生衣不厭新人不厭故  
悲不可忍怨不可去彼獨何人而居斯處



言完  
卷一  
詩集  
瑯瑯白兔東走西顧衣不如新人不如故

隴頭歌

失名氏

隴頭流水流離四下念我行役飄然曠野登高望遠  
涕零雙墮

隴頭流水鳴聲幽咽遙望秦川肝腸斷絕

蘇耽歌

蘇耽

蘇耽少以至孝著稱一日白母道果已圓升  
舉有日母曰吾獨特爾爾去吾何依耽乃留  
一櫃封鑰甚固若有所需告之如所願也預  
為植橘鑿井及郡人大疫但食一橘葉一泉

水即愈後一鶴降郡屋久而不去郡僚子弟  
彈之鶴舉足畫屋若書字辭曰

鄉原一別重來事非甲子不記陵谷遷移白骨蔽野  
青山舊時翹足高屋下見羣兒我是蘇仙彈我何為  
翻身何為翻身雲外却返吾居

短歌行○平調曲

武帝

對酒當歌人生幾何譬如朝露去日苦多慨當以慷  
憂患難忘何以解憂惟有杜康青青子衿悠悠我心  
但為君故沉吟至今呦呦鹿鳴食野之苹我有嘉賓  
鼓瑟吹笙明明如月何時可掇憂從中來不可斷絕

魏



越陌度阡枉用相存契闊談讌心念舊恩月明星稀  
烏鵲南飛繞樹三匝何枝可依山不厭高水不厭深  
周公吐哺天下歸心

步出東西門行○拂舞曲

東臨碣石以觀滄海水何澹澹山島竦峙樹木叢生  
百草豐茂秋風蕭瑟洪波湧起日月之行若出其中  
星漢燦爛若出其裏幸甚至哉歌以咏志  
神龜雖壽猶有竟時騰蛇乘霧終爲土灰老驥伏櫪  
志在千里烈士暮年壯心不已盈縮之期不但在天  
養恬之福可得永年幸甚至哉歌以詠志

善哉行○瑟調曲

文帝

上山採薇薄暮苦飢谿谷多風霜露沾衣野雉羣雌  
猿猴相追還望故鄉鬱何壘壘高山有厓林木有枝  
憂來無方人莫之知人生如寄多憂何爲今我不樂  
歲月如馳湯湯川流中有行舟隨波轉薄有似客遊  
策我良馬被我輕裘載馳載驅聊以忘憂○右章八  
句六解

矯志詩

曹植

芝桂雖芳難以餌烹尸位素餐難以成名磁石引鍊  
於金不連大朝舉士愚不聞焉抱璧塗乞無爲貴寶



履仁邁禍無爲貴道駕雛遠害不羞卑棲靈虬避難  
不恥污泥都蔗雖甘杖之必折巧言雖美用之必滅  
濟濟唐朝萬邦作孚逢蒙雖巧必得良弓聖主雖知  
必得英雄螳螂見歎齊士輕戰越王式蛙國以死獻  
道遠知驥世僞知賢覆之幘之順天之矩澤如凱風  
惠如時雨口爲禁闔舌爲發機門機之開楛矢不追

鬪體詩

牢落冥漠與道相驅隱然長寢其樂無踰

王仲宣誄

猗歟侍中遠祖彌芳公高建業佐武伐商爵同齊魯

邦祀絕亾流裔畢萬勳績唯光晉獻賜封于魏之疆  
天開之祚末冒稱王厥姓斯氏條分葉散世滋芳烈  
揚聲秦漢會遭陽九炎光中矇世祖撥亂爰建時雍  
三台樹位履道是鍾寵爵之加匪惠惟恭自君二祖  
爲光爲龍僉曰休哉宜翼漢邦或統太尉或掌司空  
百揆惟敘五典克從天靜人和皇教遐通伊君顯考  
奕葉佐時入管機密朝政以治出臨朔岱庶績咸熙  
君以淑懿繼此洪基既有令德材技廣宣強記洽聞  
幽讚微言文若春華忠若涌泉發言可詠下筆成篇  
何道不洽何藝不閒碁局逞巧博奕惟賢皇家不造



京室隕顛宰臣專制帝用西遷君乃羈旅離此阻艱  
翕然鳳舉遠竄荆蠻身窮志達居鄙行鮮振冠南嶽  
濯纓清川潛處蓬室不干勢權我公奮鉞耀威南楚  
荆人或違陳戎講武君乃義發筭我師旅高尚霸功  
投身帝宇斯言既發謀夫是與是與伊何響我明德  
投戈編都稽顙漢北我公實嘉表揚京國金龜紫綬  
以彰勳則勳則伊何勞謙靡已憂世忘家殊略卓峙  
乃署祭酒與君行止筭無遺策畫無失理我王建國  
百司雋乂君以顯舉秉機省闈戴蟬珥貂朱衣皓帶  
入侍帷幄出擁華蓋榮曜當世芳風曛藹嗟彼東夷

憑江阻湖騷擾邊境勞我師徒光光戎路霆駭風祖  
君侍華轂輝輝王塗忠榮懷附望彼來威如何不濟  
運極命衰寢疾彌留吉往凶歸翩翩孤嗣號慟崩摧  
發軔北魏遠迄南淮經歷山河泣涕如頽哀風興感  
行雲徘徊游魚失浪歸鳥忘栖吾與夫子義貫丹青  
好和琴瑟分過友生庶幾遐年携手同征如何奄忽  
棄我夙零感昔宴會志各高厲予戲夫子金石難弊  
人命靡常吉凶異制此驩之人孰先隕越何寤夫子  
果乃先逝又論死生存亡數度子猶懷疑求之明據  
儻獨有靈游魂素素我將假翼飄飄高舉超登景雲



要子天路喪柩既臻將反魏京靈輜迴軌白驥悲鳴  
虛廓無見藏景蔽形孰云仲宣不聞其聲延首歎息  
雨泣交頸嗟乎夫子永安幽冥人誰不沒達士狗名  
生榮死哀亦孔之榮

上責躬詩

於穆顯考時唯武皇受命于天寧濟四方朱旗所拂  
九土披攘玄化湧流荒服來王超商越周與唐比蹤  
篤生我皇奕世載聰武則肅烈文則時雍受禪于漢  
君臨萬邦萬邦既化率由舊則廣命懿親以藩王國  
帝曰爾侯君茲青土奄有海濱方周于魯車服有輝

旗章有敘濟濟雋乂我弼我輔伊予小子恃寵驕盈  
舉挂時網動亂國經作藩作屏先軌是隳傲我皇使  
犯我朝儀國有典刑我削我絀將寘于理元兇是率  
明明天子時唯篤類不忍我刑暴之朝肆違彼執憲  
哀予小臣改封兗邑于河之濱股肱弗置有君無臣  
荒淫之闕誰弼予身營營僕夫于彼冀方嗟予小子  
乃羅斯殃赫赫天子恩不遺物冠我玄冕要我朱紱  
光光大使我榮我華剖符受玉王爵是加仰齒金璽  
俯執聖策皇恩過隆祇承怵惕咨我小子頑兇是嬰  
逝慙陵墓存媿闕庭匪敢傲德實恩是恃威靈改加



足以沒齒昊天罔極生命不圖常懼顛沛抱罪黃墟  
願蒙矢石建旗東嶽庶立毫釐微功自贖危軀授命  
知足免戾甘赴江湘奮戈吳越天啓其衷得會哀畿  
遲奉聖顏如渴如飢心之云慕愴矣其悲天高聽卑  
皇旨照微

月重輪行

明帝

天地無窮人命有終立功揚名行之在躬聖賢度量  
得爲道中

幽憤詩

嵇康

康與呂安友善安兄吳姦通安妻遂誣弟不

孝安引康爲證復收康康義不負心保明其  
事康一旦縲絏乃作此詩鍾會素憾康勸誅  
嗟余薄祜少遭不造哀榮靡識越在襁褓母兄鞠育  
有慈無威恃愛肆姐不訓不師爰及冠帶憑寵自放  
抗心希古任其所尚託好老莊賤物貴身志在守樸  
養素全真曰余不敏好善聞人子玉之敗屢增唯塵  
大人含弘藏垢懷恥民之多僻政不由己惟此褊心  
顯明臧否感悟患愆怛若創痛欲寡其過訪議沸騰  
性不傷物頗致怨憎昔慙柳惠今媿孫登內負宿心  
外慝良朋仰慕嚴鄭樂道閒居與世無營神氣晏如



谷子不淑嬰累多虞匪降自天寔由頑疎理弊患結  
卒致囹圄對答鄙訊繫此幽阻實恥訟冤時不我與  
雖曰義直神辱志沮澡身滄浪豈云能補噫噫鳴鴈  
奮翼北遊順時而動得意忘憂嗟我憤嘆曾莫能儔  
事與願違邁茲淹留窮達有命亦又何求古人有言  
善莫近名奉時恭默咎悔不生萬石周慎安親保榮  
世務紛紜祇攬予情安樂必誠乃終利貞煌煌靈芝  
一年三秀予獨胡爲有志不就懲難忠復心焉內疚  
庶勗將來無馨無臭采薇山阿散髮巖岫永嘯長吟  
頤性養壽

襍詩

微風清扇雲氣四除皎皎亮月得于高隅興命公子  
携手同車龍驥翼翼揚鑣踟躕肅肅宵征造我友廬  
光燈吐輝華幔長舒鸞觴酌醴神鼎烹魚絃超子野  
歎過綿駒流詠太素俯讚玄虛孰克英賢與爾剖符

贈秀才入軍

良馬旣閑麗服有暉左攬繁弱右接忘歸風馳電逝  
躡景追飛凌厲中原顧眄生姿  
息徒蘭圃秣馬華山流磻平臯垂綸長川目送歸鴻  
手揮五絃俯仰自得游心太玄嘉彼釣叟得魚忘筌



言字  
郢人逝矣誰與盡言

閒夜肅清朗月照軒微風動桂組帳高寒旨酒盈樽  
莫與交歡鳴琴在御誰與鼓彈仰慕同趣其馨若蘭  
佳人不存能不永歎

流俗難悟逐物不還至人遠鑒歸之自然萬物爲一  
四海同宅與彼共之予何所惜生若浮寄暫見忽終  
世故紛紜弃之八成澤雉雖飢不願園林安能服御  
勞形苦心身貴名賤榮辱何在貴得肆志縱心無悔

賦席

張純

張純張儼俱童少有清才往見驃騎將軍朱

吳

據據聞其才名欲試之曰各賦一物然後乃  
坐純曰駿裏以迅驟爲上鷹隼以輕疾爲妙  
何必積思皆立成

席爲冬設簟爲夏施揖讓而坐君子攸宜

賦犬

張儼

守則有威出則有獲韓盧宋鵲書名竹帛

燕飲歌

司馬懿

天地開闢日月重光遭逢際會奉辭遐方將掃逋穢  
還過故鄉肅清萬里總齊八荒告成歸老待罪武陽

勵志詩

張華

晉

詩宗

卷一



太儀幹運天迴地游四氣鱗次寒暑環周星火既夕  
忽焉素秋涼風振落熠燿宵流吉士思秋寔感物化  
日與月與荏苒代謝逝者如斯曾無日夜嗟爾庶士  
胡寧自舍仁道不遐德輶如羽求焉斯至衆鮮克舉  
大猷玄漠將抽厥緒先民有作貽我高矩雖有淑姿  
放心縱逸田般于游居多暇日如彼梓材弗動丹漆  
雖勞朴斲終負素質養由矯矢歎號于林蒲盧縈繳  
神感飛禽末技之妙動物應心研精耽道安有幽深  
安心恬蕩棲志浮雲體之以質彪之以文如彼南畝  
力耒既勤蘆蓑致功必有豐殷水積成淵載瀾載清

土積成山歎蒸鬱冥山不讓塵川不辭盈勉爾含弘  
以隆德聲高以下基洪由纖起川廣自源成人在始  
累微以著乃物之理纏牽之長實累千里復禮終朝  
天下歸仁若金受矚若泥在鈞進德修業暉光日新  
隰朋仰慕予亦何人

補亡詩

束皙

循彼南陔言采其蘭眷戀庭闈心不遑安彼居之子  
罔或游盤馨爾夕膳潔爾晨飧循彼南陔厥草油油  
彼居之子色思其柔眷戀庭闈心不遑留馨爾夕膳  
潔爾晨羞有獮有獮在河之浹凌波赴汨噬魴捕鯉



嗷嗷林鳥受哺于子養隆敬薄惟禽之似助增爾虔以介丕祉

白華朱萼被於幽薄粲粲門子如磨如錯終身三省匪愔其恪白華絳趺在陵之陬蓊蓊士子沮而不渝竭誠盡敬亶亶忘劬白華玄足在丘之曲堂堂處子無營無欲鮮侔晨葩莫之點辱

黓黓重雲輯輯和風黍華陵巔麥秀丘中靡田不播九穀斯豐奕奕玄霄濛濛甘雷黍發稠華亦挺其秀靡田不殖九穀斯茂無高不播無下不殖芑芑其稼參參其穡穡我王委充我民食玉燭陽明顯猷翼翼

蕩蕩夷庚物則由之蠢蠢庶類王亦柔之道之既由化之既柔木以秋零草以春抽歟在于草魚躍順流四時遞謝八風代扇纖阿案晷星變其躔五緯不逆六氣無易惜惜我王紹文之跡

瞻彼崇丘其林藹藹植物斯高動類斯大周風既洽王猷允泰漫漫方輿回回洪覆何類不繁何生不茂物極其性人永其壽恢恢大園茫茫九壤資生仰化于何不養人無道天物極則長

肅肅君子由儀率性明明后辟仁以爲政魚游清沼鳥萃平林濯鱗鼓翼振振其音賓寫爾誠主竭其心



詩宗 子集  
時之和矣何患何修文化內輯武加外悠

隴西行

陸機

我靜如鏡民動如烟事以形兆應以象懸豈曰無才  
世鮮興賢

短歌行

置酒高堂悲歌臨觴人壽幾何逝如朝霜時無重至  
華不再陽蕓以春暉蘭以秋芳來日苦短去日苦長  
今我不樂蟋蟀在房樂以會興悲以別章豈曰無感  
憂爲子忘我酒旣旨我看旣臧短歌有詠長夜無荒

東方朔畫贊

夏侯湛

矯矯先生肥遯居貞退不終否進亦避榮臨世濯足  
希古振纓涅而無滓旣濁旣清無滓伊何高明克柔  
能清伊何視汙若浮樂在必行處淪因憂跨世陵時  
遠蹈獨游瞻望往代爰想遐蹤邈邈先生其道猶龍  
染迹朝隱和而不同栖遲下位聊以從容我來自東  
言適茲邑敬問墟墳企佇原隰墟墓徒存精靈永戢  
民患其軌祠宇斯立徘徊寺寢遺像在圖周旋祠宇  
庭序荒蕪榱棟傾落草萊弗除肅肅先生豈焉是居  
是居弗形悠悠我情昔在有德罔不遺靈天秩有禮  
神鑑孔明彷彿風塵用垂頌聲



伊子之先奕葉熙隆惟祖惟曾載揚休風顯考康侯  
無祿早終名器雖光勳業未融篤生吾子誕茂淑姿  
克岐克嶷知章知微鈞濶揆賾味道研幾匪直也人  
邦家之輝子之邁閔曾未斲髻如彼危根當此衝颯  
德之休明靡幽不喬弱冠流芳雋聲清劬爾舅唯榮  
爾宗惟瘁幼秉殊操違豐安匱撰錄先訓俾無隕墜  
舊文新藝罔不必肄潘揚之穆有自來矣矧乃今日  
慎終如始爾休爾戚如實在已視予猶父不得猶子  
敬亦既篤愛亦既淡雖殊其年實同厥心日昃景西

楊仲武誄

潘岳

望子朝陰如何短折昔世湮沉寢疾彌留守茲孝友  
臨命忘身顧戀慈母哀哀慈母痛心疾首嗷嗷同生  
悽悽諸舅春蘭擢莖方茂其華荆實挺璞將剖于和  
含芳委耀毀璧摧柯嗚呼仲武痛哉奈何德宮之艱  
同次外寢唯我與爾對筵接枕自時迄今曾未盈稔  
姑姪繼隕何痛斯甚披帙散書屢覩遺文有造有寫  
或草或真執玩周復想見其人紙勞于手涕沾于巾  
龜筮既襲塋隧既開痛矣楊子與世長乖朝濟洛川  
夕次山隈歸鳥頡頏行雲徘徊臨穴永設撫櫬盡哀  
遺形莫紹增慟余懷魂兮往矣梁木實摧



夏侯常侍誄

禹錫玄珪實曰文命克明克聖光啓夏政其在于漢  
邁勳惟嬰患弘儒業小大雙名顯祖曜德牧充及荆  
父守淮岱治亦有聲英英夫子灼灼其儁飛辯摘藻  
華繁玉振如彼隨和發彩流潤如彼錦績列素點絢  
人見其表莫測其裏徒謂吾生文勝則史心照神交  
唯我與子且歷少長違觀終始子之承親孝齊閔參  
子之友悌和如瑟琴事君直道與朋信心雖實唱高  
猶賞爾音弱冠厲翼羽儀初昇公弓既招皇輿乃徵  
內贊兩宮外宰黎烝忠節允著清風載興決彼樂都

寵子唯王設官建輔妙簡邦良用取喉舌相爾南陽  
惠訓不倦視民如傷乃眷北顧辭祿延熹余亦偃息  
無事明時疇昔之遊二紀于茲班白攜手何歡如之  
居吾語汝衆實勝寡人惡雋異俗疵文雅執戟疲揚  
長沙投賈無謂爾高恥居物下子乃洗然變色易容  
慨然歎曰道固不同爲仁由己匪我求蒙誰毀誰譽  
何去何從莫涅匪緇莫磨匪磷子獨正色居屈志申  
雖不爾以猶致其身獻替盡規媚茲一人讜言忠謀  
世祖是嘉將僕儲皇奉轡承華先朝末命聖列顯加  
入侍帝闈出光厥家我聞積善神降之吉宜享遐紀



長保天秩如何斯人而有斯疾曾未知命中年隕卒  
惟爾之存匪爵而貴甘食美服重珍兼味臨終遺誓  
永錫爾類斂以時襲殯不簡器誰能拔俗生盡其養  
孰是養生而薄其葬淵哉若人縱心條暢傑操明達  
困而彌亮柩輅既祖容體長歸存亾永設逝者不追  
望子舊車覽爾遺衣幅抑失聲迸涕交揮非子爲慟  
吾慟爲誰日往月來暑退寒襲零露沾凝勁風淒急  
慘爾其傷念我良執適子素館撫孤相泣前患未弭  
後感仍集積悲滿懷逝矣安及

離合

佃漁始化人民穴處意守醇樸音應律呂桑梓被原  
卉木在野錫鑿未設金石弗舉害咎蠲消吉德流普  
谿谷可安奚作棟宇嫣然以喜焉懼外侮熙神委命  
已求多祐嘆彼季末口出擇語誰能默識言喪厥所  
壟晦之諺龍潛巖阻渺義崇亂少長失敘

劔閣銘

張載

巖巖梁山積石峨峨遠屬荆衡近綴岷嶓南通邛棘  
北達褒斜狹過鼓碣高踰嵩華惟蜀之門作固作鎮  
是曰劔閣壁立千仞窮路之險極路之峻世濁則逆  
道清斯順閉由違漢開自有晉秦得百二并吞諸侯



齊得十二田生獻壽矧茲狹隘土之外區一人荷載  
萬夫越起形勝之地匪親勿居昔在武侯中流而喜  
山河之固見屈吳起興實在德險亦難恃洞庭孟門  
二國不祀自古迄今天命匪易憑阻作昏鮮不敗績  
公孫既滅劉氏銜壁覆車之軌無或重跡勒銘山阿  
敢告梁益

周小史

張翰

翩翩周生婉變幼童年十有五如日在東香膚柔澤  
素質參紅團輔圓頤菡萏芙蓉爾形既淑爾服亦鮮  
輕車隨風飛霧流烟轉側倚靡顧眄優妍和顏善笑

美口善言

贈溫嶠

郭璞

人亦有言松竹有林及爾臭味異苔同岑言以忘得  
交以淡成同匪伊和惟我與生爾神余契我懷子情  
攜手一豁安知塵冥

洗藥池

葛洪

洞陰泠泠風佩清清仙居永劫華木長榮

獨漉篇

佚名氏

獨漉獨漉水深泥濁泥濁尚可木溪殺我雍雍雙鴈  
遊戲田畔我欲射鴈念子孤散翩翩浮萍得風搖輕



我心何合與之同并空牀低帷誰知無人夜衣錦繡  
誰別偽真刀鳴箭中倚床無施父冤不報欲活何爲  
猛虎斑斑遊戲山間虎欲齧人不避豪賢

孫登隱居詩

庾闡

靈巖霞蔚石室鱗構青松標空蘭泉吐哺龍薈可游  
芳津可嗽玄谷蕭寥鳴琴獨奏先生體之寂坐幽岸  
凝冰結樸熙陽靡煥潛真內全飛榮外散凌崖高嘯  
希風朗彈道有冥廢運有昏消達隱不巖玄迹不標  
或曰先生晦德逍遙嵇子秀達英風朗烈道雋薰芳  
鮮不玉折兆動初萌妙覽奇絕翹首丘冥仰想玄哲

蘭亭集詩

王羲之

羲之與謝安以下十一人四言五言各一首  
王豐之等十五人或四言或五言各一首王  
獻之等十六人詩各不成罰酒

代謝鱗次忽焉以周欣此暮春和氣載柔詠彼舞雩  
異世同流迺勢齊契散懷一丘

蘭亭集詩

庾友

馳心域表寥寥遠邁理感則一冥然斯會

蘭亭集詩

王肅之

在昔暇日味存林嶺今我斯遊神怡心靜



蘭亭集詩

謝萬

肆眺崇阿寓目高林青蘿翳岫脩竹冠岑谷流清響  
條鼓鳴音玄岬吐潤霏霧成陰

蘭亭集詩

王凝之

莊浪濠津巢步穎湄冥心真寄千載同歸

蘭亭集詩

王徽之

散懷山水蕭然忘羈秀薄粲穎疎松籠屋游羽扇霄  
鱗躍清池歸目寄歡心冥二奇

蘭亭集詩

王豐之

肆眇巖岫臨泉濯趾感興魚鳥安居幽時

後齋詩

湛方生

解纓復褐辭朝歸藪門不容軒宅不盈畝茂草籠庭  
滋蘭拂牖撫我子姪携我親友茹彼園蔬飲此春酒  
開櫺攸瞻坐對心阜心焉孰託託心非有素構易抱  
玄根難朽即之匪遠可以長久

題宋纖石壁

馬岌

丹厓百丈青壁萬尋奇木蒼鬱蔚若鄧林其人如玉  
維園之瑛室邇人遐實勞我心

酒德頌

趙整

苻堅與羣臣飲酒以極醉為限整作歌



地列酒泉天垂酒池杜康妙識儀狄先知紂喪殷邦  
桀傾夏國由此言之前危後則  
穫黍西秦採麥東齊春封夏發鼻納心迷

三秦記民謠

佚名氏

武功太白去天三百孤雲兩角去天一握山水險阻  
黃金子午虵盤鳥籠勢與天通

停雲

陶潛

靄靄停雲濛濛時雨八表同昏平路伊阻靜寄東軒  
春醪獨撫良朋悠邈搔首延佇停雲靄靄時雨濛濛  
八表同昏平陸成江有酒有酒閒飲東窻願言懷人

舟車靡從東園之樹枝條再榮競用新好以招余情  
人亦有言日月于征安得促席說彼平生翩翩飛鳥  
息我庭柯斂翮閒止好聲相和豈無他人念子寔多  
願言不獲抱恨如何

時運

邁邁時運穆穆良朝襲我春服薄言東郊山滌餘靄  
宇曖微霄有風自南翼彼新苗洋洋平津乃漱乃濯  
邈邈遐景載欣載矚稱心而言人亦易足揮茲一觴  
陶然自樂延目中流悠悠清沂童冠齊業閒詠以歸  
我愛其靜寤寐交揮但恨殊世邈不可追斯晨斯夕



言息其廬花藥分列林竹翳如清琴橫床濁酒半壺  
黃唐莫違慨獨在余

榮木

采采榮木結根于茲晨耀其華夕已喪之人生若寄  
顛顛有時靜言孔念中心悵而采采榮木于茲托根  
繁華朝起慨暮不存真脆由人禍福無門匪道曷依  
匪善奚敦嗟予小子稟茲固陋徂年旣流業不增舊  
志彼不舍安此日富我之懷矣怛焉內疚先師遺訓  
余豈云墜四十無聞斯不足喪脂我名車策我名驥  
千里雖遙孰敢不至

贈長沙公族祖

長沙公於予爲族祖同出大司馬昭穆旣遠  
已爲路人經過潯陽臨別贈此

同源分流人易世疎慨然寤嘆念茲厥初禮服遂悠  
歲月眇徂感彼行路眷然躊躇於穆令族允構斯堂  
諧氣冬暄曠懷圭璋爰采春花載警秋霜我曰欽哉  
實宗之光伊余云邁在長志同笑言未久逝焉西東  
遙遙三湘滔滔九江山川阻遠行李時通何以寫心  
貽此話言進篋雖微終焉爲山敬哉離人臨路悽然  
款襟或遼音問其先



答龐參軍

衡門之下有琴有書載彈載詠爰得我娛豈無他好  
樂是幽居朝爲灌園夕偃蓬廬人之所寶尚或未珍  
不有同愛云何以親我求良友寔觀懷人懽心孔洽  
棟宇唯鄰伊余懷人欣德孜孜我有旨酒與汝樂之  
乃陳好言乃著新詩一日不見如何不思嘉遊未數  
誓將難分送爾于路銜觴無欣依依舊楚邈邈西雲  
之子之遠良話曷聞昔我云別倉庚載鳴今也遇之  
霰雪飄零大藩有命作使上京豈忘宴安王事靡寧  
慘慘寒日肅肅其風翩彼方舟容裔江中勗哉從人

在始患終敬茲良辰以保爾躬

勸農

悠悠上古厥初生人傲然自足抱朴含真智巧旣萌  
資待靡因誰其贍之實賴哲人哲人伊何時爲后稷  
贍之伊何實曰播殖舜旣躬耕禹亦稼穡遠若周典  
八政始食熙熙令音猗猗原陸卉木繁榮和風清穆  
紛紛士女趨時競逐桑婦宵征農夫野宿氣節易過  
和澤難久冀鼓攜儷沮溺結耦相彼賢達猶勤壟畝  
矧伊衆庶曳裾拱手民生在勤勤則不匱宴安自逸  
歲暮奚冀儋石不儲飢寒交至顧爾儔列能不懷愧



孔耽道德樊須是鄙董樂琴書田園不履若能超然  
投跡高軌敢不斂衽敬讚德美

命子

悠悠我祖爰自陶唐邈焉虞賓歷世重光御龍勤夏  
豕韋翼商穆穆司徒厥族以昌紛紛戰國漠漠衰周  
鳳隱於林幽人在丘逸蚪遠雲奔鯨駭流天集有漢  
眷予愍侯於赫愍侯運當攀龍撫劍夙邁顯茲武功  
書誓山河啓土開封疊疊丞相允迪前蹤渾渾長源  
蔚蔚洪柯羣川載導衆條載羅時有語默運因隆宥  
在我中晉業融長沙桓桓長沙伊勳伊德天子疇我

專征南國功遂辭歸臨寵不忒孰謂斯心而近可得  
肅矣我祖慎終如始直方二臺惠和千里於皇仁考  
淡焉虛止寄迹風雲寘茲愠喜嗟余寡陋瞻望不及  
顧慚華鬢負影隻立三千之罪無後爲急我誠念哉  
呱聞爾泣卜云嘉日占亦良時名汝曰儼字汝求忠  
溫恭朝夕念茲在茲尚想孔伋庶其企而厲夜生子  
遽而求火凡百有心奚恃於我旣見其生實欲其可  
人亦有言斯情無假日居月諸漸免于孩福不虛至  
禍亦易來夙興夜寐願爾斯才爾之不才亦已焉哉

歸鳥



翼翼歸鳥晨去于林遠之八表近憇雲岑和風不洽  
翩翩求心願儔相鳴景庇清陰翼翼歸鳥載翔載飛  
雖不懷游見林情依遇雲頡頏相鳴而歸遐路誠悠  
性愛無遺翼翼歸鳥馴林徘徊豈患天路欣及舊棲  
雖無昔侶衆聲每諧日夕氣清悠然其懷翼翼歸鳥  
戢羽寒條游不曠林宿則森標晨風清興好音時交  
增繳奚施已卷安勞

自祭文

茫茫大塊悠悠高旻是生萬物余得爲人自余爲人  
逢運之貧簞瓢屢罄絺綌冬陳含歡谷汲行歌負薪

翳翳柴門事我宵晨春秋代謝有務中園載耘載耔  
迺育迺繁欣以素讀和以七絃冬曝其日夏濯其泉  
勤靡餘勞心有常閒樂天委分以至百年惟此百年  
夫人憂之懼被無成愒日惜時存爲世珍沒亦見患  
嗟我獨邁曾是異茲寵非已榮涅豈吾緇粹兀窮廬  
酣飲賦詩識運知命疇能因眷余今斯化可以無恨  
壽涉百齡身慕肥遁從老得終奚所復戀寒暑逾邁  
亾旣異存外姻晨來良友宵奔葬之中野以安其魂  
窅窅我行蕭蕭墓門奢侈宋臣儉笑王孫廓兮已滅  
慨焉已遐不封不樹日月遂過匪貴前譽孰重後歌



人生寔難死如之何

陶徵士誄

顏延之

物尚孤生人固介立豈伊時邁曷云歲及嗟乎若士  
望古遙集韜此洪族蔑彼名級睦親之行至自非敦  
然諾之信重於布言廉淡簡潔貞夷粹溫和而能峻  
博而不繁依世尚同詭時則異有一於此兩非默置  
豈若夫子因心違事與榮好古薄身厚志世霸虛禮  
州壤推風孝惟義養道必懷邦人之秉彝不隘不恭  
爵同下士祿等上農度量惟鈞進退可限長卿棄官  
稚賓自免子之悟之何悟之辯賦詩歸來高蹈獨善

亦既超曠無適非心汲流舊巖葺宇家林晨烟暮靄  
春煦秋陰陳書綴卷置酒絃琴居備勤儉躬兼貧病  
人否其憂子然其命隱約就閑遷延辭聘非直也明  
是惟道性糾纏幹流冥漠報施孰云與仁實疑明  
謂天蓋高胡譽斯義履信曷憑忠順何實年在中身  
痰維疴疾視死如歸臨凶若吉藥劑不嘗禱視非恤  
儻幽告終懷和長畢敬述靖節式尊遺占存不願豐  
沒無求贍省計却聘輕哀薄斂遭壤以穿旋葬而窆  
淡心追往遠情逐化自爾介居及我多暇伊好之洽  
接閭鄰舍宵盤晝憩非舟非駕念昔宴私舉觴相誨



獨正者危至方則闕哲人卷舒布在前載取鑒不遠  
吾規子珮爾實愀然中言而發違衆速尤迂風先蹶  
身才非實榮聲有歇聲音永矣誰箴余闕仁焉而終  
智焉而斃黔婁既沒展禽亦逝其在先生同塵往世  
旌此靖節加彼康惠

祭屈原文

蘭薰而摧玉纈則折物忌堅芳人諱明潔曰若先生  
逢辰之皎溫風息時飛霜急節羸羊邁紛昭懷不端  
謀折儀尚貞蔑椒蘭身絕郢闕迹徧湘干比物荃蓀  
連類龍鸞聲溢金石志華日月如彼樹芳實穎實發

望泫心欷瞻羅思越藉用可塵昭忠難闕

祭古冢文

謝惠連

忝總徒旅版築是司窳泉爲壑聚壤成基一槨旣啓  
雙棺在茲捨畚悽愴縱鍤連而芻靈已毀塗車旣摧  
几筵糜腐俎豆傾低盤或梅李盞或醢醢蔗傳餘節  
瓜表遺犀追唯夫子生自何代曜質幾年潛靈幾載  
爲壽爲夭寧顯寧晦銘誌堙滅姓字不傳今誰子後  
曩誰子先功名美惡如何蔑然百堵皆作十仞斯齊  
壙不可轉漚不可迴黃腸旣毀復房已積循題興念  
撫俑增哀射聲垂仁廣漢流渥祠骸府阿掩骼城曲



仰羨古風爲君改卜輪移北隍窀穸東麓墳卽新營  
棺仍舊木合葬非古周公所存敬遵昔義還耐雙魂  
酒以兩壺牲以特豚幽靈髣髴歆我犧樽

青谿小姑娘曲

佚名氏

日暮風吹葉落依枝丹心寸素愁君未知

安東平

佚名氏

淒淒烈烈北風爲雪船道不通步道斷絕  
吳中細布闊幅長度我有一端與郎作跨  
微物雖輕拙手所作餘有三丈爲郎別曆  
制爲輕巾以奉故人不持作好與郎拭塵

梁

頭陀寺碑文

王巾

質判玄黃氣分清濁涉器千名含靈萬族淳源上派  
澆風下瀆愛流成海情塵爲岳皇矣能仁撫期命世  
乃睠中土聿來迦衛奄有大千遂荒三界殷鑑四門  
幽求六歲亦旣成德妙盡無爲帝獻方石天開淥池  
祥河輟木寶樹低枝通莊九折安步三危川靜波澄  
龍翔雲起耆山廣運給園多士金粟來儀文殊戾止  
應乾動寂順民終始法本不然今則無滅象正雖闡  
希夷未缺於昭有齊戒揚洪烈釋網夏維玄津重榘  
惟此名區禪慧攸託倚據崇巖臨睨通壑溝池湘漢



堆阜衝霍騰騰亭臯幽幽林薄媚茲邦后法流是挹  
氣茂三闕情超六入眷言靈宇載懷興葺丹刻翬飛  
輪奐離立象設既闢辟容已安桂溪冬燠松疎夏寒  
神足游息靈心往還勝幡西振貞石南刊

新刻漏銘

陸倕

一暑一寒有明有晦神道無迹天工罕代乃置挈壺  
是唯熙載氣均衡石晷正權槩世道交喪禮術銷亾  
遽遷水火爭倒衣裳擊刁舛次業木乖方爰究爰度  
時唯我皇方壺外次圓流內襲洪殺殊等高卑異級  
靈虬承注陰蟲吐喻儻往忽來鬼出神入微若抽繭

逝如激電耳不輟音眼無留眄銅史司刻金徒抱箭  
履薄非兢臨淡因戰授受靡訾登降弗爽唯精惟一  
可法可象月不知來日無藏往分似符契至猶影響  
合昏暮卷蕙莢晨生尚辨天意猶測地精况我神造  
通幽洞靈配皇等極為世作程

隴頭流水歌

佚名氏

西上隴陂羊腸九迴山高谷深不覺脚酸

地驅樂歌

佚名氏

青青黃黃雀石頽唐搥殺野牛押殺野羊  
驅羊入谷白羊在前老女不嫁蹋地喚天

周北



側側力力念君無極枕郎左臂隨郎轉側  
摩挲郎鬚看郎顏色郎不念女不可與力

宴秦孝王子并州作

文帝

開皇十年高祖幸并州宴秦王子相帝爲此  
詩明年子相卒十八年秦孝王薨

紅顏詎幾玉貌須臾一朝花落白髮難除明年後歲  
誰有誰無

上崔相百憂章

李白

白時在潯陽獄

共公赫怒天維中摧鯤鯨噴蕩揚濤起雷魚龍陷人

成此禍胎火焚崑山玉石相碰仰希霖雨灑寶炎煨  
箭發石開戈揮日迴鄒衍慟哭燕霜颯來微誠不感  
猶繫夏臺蒼鷹搏攫丹棘崔嵬豪聖凋枯王風傷哀  
斯文未喪東岳豈頽穆逃楚難鄒脫吳災見機苦遲  
二公所哈驥不驟進麟何來哉星離一門草擲二孩  
萬憤結習憂從中催金瑟玉壺盡爲愁媒舉酒太息  
泣血盈楮台星再朗天網重恢屈法申恩棄瑕取材  
冶長非罪尼父無猜覆盆儻舉應照寒灰

來日大難

來日一身糶糧負薪道長食盡苦口焦脣今日醉飽

詩宗

卷集



樂過千春仙人相存誘我遠學海凌三山陸憇五嶽  
乘龍天飛日瞻兩角授以神藥金丹滿握媿姑蒙恩  
淡媿短促思填東海強銜一木道重天地軒師廣成  
蟬翼九五以求長生下士大笑如蒼蠅聲

畫馬讚

杜南

韓幹畫馬毫端有神驊騮老夫驪褭清新魚目瘦腦  
龍文長身雪垂白肉風蹙鬃筋逸態蕭疎高驤縱恣  
四蹄雷電一日天地御者閒敏去何難易愚夫乘騎  
動心顛躓瞻被駿骨實惟龍媒漢歌燕市已矣茫哉  
但見駑駘紛然往來良工惆悵落筆雄才

大唐中興頌

元結

安祿山陷洛陽長安玄宗幸蜀明年肅宗復  
兩京上皇還京師刺史元結製頌顏真卿書  
磨崖石而刻之碑在道州浯溪上

噫嘻前朝孽臣姦驕爲悞爲妖邊將騁兵毒亂國經  
羣生失寧大駕南巡百寮竄身奉賊稱臣天將昌唐  
繫睨我皇匹馬北方獨立一呼千麾萬旗戎卒前驅  
我師其東儲皇撫戎蕩攘羣兇復復指期曾不逾時  
有國無之事有至難宗廟再安二聖重歡地闢天開  
蠲除旤灾瑞慶大來凶徒逆儔涵濡天休死生堪羞



功勞位尊忠烈名存澤流子孫盛德之興山高日升  
萬祿是膺能令大君聲容法法不在斯文湘江東西  
中直浯溪石崖天齊可磨可鐫刊此頌焉何千萬年

元和聖德詩

韓愈

皇帝卽阼物無違拒曰暘而暘曰雨而雨維是元年  
有盜在夏欲覆其州以踵近武皇帝曰嘻豈不在我  
負鄙爲艱縱則不可出師征之其衆十旅軍其城下  
告以福禍腹敗枝披不敢保聚擲首陴外降幡夜豎  
疆外之險莫過蜀土韋皋去鎮劉闢守後血人于牙  
不肯吐口開庫啗士曰隨所取汝張汝弓汝鼓汝鼓

汝爲表書求我帥汝事始上聞在列咸怒皇帝曰然  
嗟遠士女苟附而安則且付與讀命於庭出節少府  
朝發京師夕至其部闢喜謂黨汝振而伍蜀可全有  
此不當受萬牛鬻炙萬甕行酒以錦纏股以紅帕首  
有恇其兇有餌其誘其出穰穰隊以萬數遂劫東川  
遂據城阻皇帝曰嗟其又可許爰命崇文分卒禁禦  
有安其驅無暴我野日行三十徐壁其右闢黨聚謀  
鹿頭是守崇文奉詔進退規矩戰不貪殺擒不濫數  
四方節度整兵頓馬上章乞討埃命起坐皇帝曰嘻  
無汝煩苦荆并洎梁在國門戶出師三千各選爾醜



四軍齊作殷其如阜或拔其角或脫其距長驅洋洋  
無有齟齬八月壬午開棄城走載妻與妾包裹稚乳  
是日崇文入處其字分散逐捕搜原剔藪闢窟見窘  
無地自處俯視大江不見洲渚遂自顛倒若杵投臼  
取之江中枷脰械手婦女纍纍啼哭拜叩來獻闕下  
以告廟社周示城市咸使觀覩解脫孿索夾以碓斧  
婉婉弱子赤立偃僂牽頭曳足先斷腰脅次及其徒  
體骸撐拄末乃取闕駭汗如寫揮刀紛紜爭刳膾脯  
優賞將吏扶珪綴組帛堆其家粟塞其庾哀憐陣歿  
廩給孤寡贈官封墓周帀宏溥經戰伐地寬免租簿

施令酬功急疾如火天地中間莫不順序幽恆青魏  
東盡海浦南至徐蔡區外雜虜怛威報德踧踖蹈舞  
掉棄兵革私習簋簠來請來覲十百其耦皇帝曰吁  
伯父叔舅各安爾位訓厥眈晦正月元日初見宗祖  
躬執百禮登降拜俯薦饗新宮視瞻梁栢感見容色  
淚落入俎侍祠之臣助我惻楚乃以上辛於郊用牡  
除于國南鱗笱毛簏廬幕周施開揭磊砢獸盾騰擘  
圓壇帖妥天兵四羅旂常婀娜駕龍十二魚魚雅雅  
宵昇于丘奠璧獻學衆樂驚作轟飀融冶紫焰噓呵  
高靈下墮羣星從坐錯落侈哆日君月妃煥赫嫫媿



詩宗  
濟鬼濛鴻嶽祇業峨飫沃羶薌產祥降嘏鳳凰應奏  
舒翼自拊赤鱗黃龍透陀結糾卿士庶人黃童白叟  
踊躍歡呀失喜噎歐乾清坤夷境落褰舉帝車迴來  
日正當午幸丹鳳門大赦天下滌濯剗礮磨滅瑕垢  
續功臣嗣拔賢任耆孩養無告仁滂施厚皇帝神聖  
通達今古聽聰視明一似堯禹生知法式動得理所  
天錫皇帝為天下主并包蓄養無異鉅億載萬年  
敢有違者皇帝儉勤盥濯陶瓦斥遣浮華好此綈紵  
勅戒四方侈則有咎天錫皇帝多麥與黍無名水旱  
耗于雀鼠億載萬年有富無窶皇帝正直別白善否

擅命而狂既翦既去盡逐羣姦靡有遺侶天錫皇帝  
龐臣碩輔博問遐觀以置左右億載萬年無敢余侮  
皇帝大孝慈祥悌友怡怡愉愉奉太皇后決于族親  
濡及九有天錫皇帝與天齊壽登茲太平無怠永久  
億載萬年為父為母博士臣愈職是訓詁作為歌詩  
以配吉甫

岐山操

周公為太公作

我家于豳自我先公伊我承緒敢有不同今狄之人  
將土我疆民為我戰誰使死傷彼岐有岨我往獨處



詩宗 三子集  
人莫余追無息我悲

猗蘭操

孔子傷不逢時作其曰習習谷風以陰以雨  
云云

蘭之猗猗揚揚其香不採而佩於蘭何傷今天之旋  
其曷爲然我行四方以日以年雪霜貿貿薺麥之茂  
子如不傷我不爾觀薺麥之茂薺麥之有君子之傷  
君子之守

履霜操

尹吉甫子伯奇無罪見逐自傷作歌其曰朝

履霜兮採晨寒云云

父兮兒寒母兮兒飢兒罪當答逐兒何爲兒在中野  
以宿以處四無人聲誰與兒語兒寒何衣兒飢何食  
兒行于野履霜以足母生衆兒有母憐之獨無母憐  
兒寧不悲

平淮西碑銘

唐承天命遂臣萬邦孰居近土襲盜以狂往在玄宗  
崇極而圯河北悍驕河南附起四聖不宥屢興師征  
有不能克益戍以兵夫耕不食婦織不裳輸之以車  
爲卒賜糧外多失朝曠不獄狩百隸怠官事亾其舊



帝時繼位顧瞻咨嗟惟汝文武孰恤予家既軒吳蜀  
旋取山東魏將首義六州降從淮蔡不順自以為強  
提兵叫譴欲事故常始命討之遂連姦鄰陰遣刺客  
來賊相臣方戰未利內驚京師羣公上言莫若惠來  
帝為不聞與神為謀乃相同德以訖天誅乃勅顏胤  
懋武古通咸統於弘各奏汝功三方分攻五萬其師  
大軍北乘厥數倍之嘗兵洄曲軍士蠢蠢既翦凌雲  
蔡卒大窘勝之邵陵鄆城來降自夏入秋複屯相望  
兵頓不勵告功不時帝哀征夫命相往釐士飽而歌  
馬騰於槽試之新城賊遇敗逃盡抽其有聚以防我

西師躍入道無留者頌頌蔡城其疆千里既入而有  
莫不順矣帝有恩言相度來宣誅止其魁釋其下人  
蔡之卒夫投甲呼舞蔡之婦女迎門笑語蔡人告饑  
船粟往哺蔡人告寒賜以繒布始時蔡人禁不往來  
今相從戲里門夜開始時蔡人進戰退戮今盱而起  
左殮右粥為之擇人以收餘德選吏賜牛教而不稅  
蔡人有言始迷不知今乃大覺羞前之為蔡人有言  
天子明聖不順族誅順保性命汝不吾信視此蔡方  
孰為不順往斧其吭凡叛有數聲勢相倚吾強不支  
汝弱奚恃其告而長而父而兄奔走偕來同我太平



淮蔡爲亂天子伐之既伐而飢天子活之始議伐蔡  
卿士莫隨既伐四年小大並疑不赦不疑由天子明  
凡此蔡功惟斷乃成既定淮蔡四夸畢來遂開明堂  
坐以治之

祭張員外文

貞元十九君爲御史余以無能同詔並跼君德渾剛  
標高揭已有不吾如唾猶泥滓余竊而狂年未三紀  
乘氣加人無挾自恃彼婉孌者實憚吾曹側肩帖耳  
有舌如刀我落陽山以尹鼂孫君飄臨武山林之牢  
歲弊寒兇雪虐風饕顛於馬下我泗君咷夜息南山

同臥一席守隸防夫觚頂交距洞庭漫汗粘天無壁  
風濤相脛中作霹靂追程旨進帆船激南上湘水  
屈氏所沈二妃行迷淚蹤染林山哀浦忠鳥獸叫音  
余唱君和百篇在吟君止于縣我又南踰把觥相飲  
後期有無期宿界上一又相語自別幾時遽變寒暑  
枕臂敲眠加余以股僕來告言虎入廢處無敢驚逐  
以我驟去君云是物不駭於藥虎取而往來寅其微  
我預在此與君俱膺猛獸果信惡禱而憑余出嶺中  
君埃州下偕椽江陵非余望者郴山奇變其水清寫  
泊沙倚石有選無捨衡陽放酒熊咆虎嘯不存令章



罪籌媚毛委舟湘流往觀南嶽雲壁潭潭穹林攸擢  
避風太湖七日鹿角鉤登大鮎怒頰豕狗齧盤炙酒  
羣奴餘啄走官皆下首下尻高下馬伏塗從事是遭  
予徵博士君以使已相見京師過願之始分教東生  
君掾雍首兩都相望於別何有解手背面遂十一年  
君出我入如相避然生闊死休吞不復宣刑官屬郎  
引章訐奪權臣不愛南昌是幹明條謹獄岷獠戶歌  
用遷澧浦爲人受瘥還家東都起令河南屈拜後生  
憤所不堪屢以正免身伸事蹇竟死不昇孰勸爲善  
丞相南討余辱司馬議兵大梁走出洛下哭不憑棺

奠不親學不撫其子葬不送野望君傷懷有隕如瀉  
銘君之績納石壤中爰及祖考紀德事功外著後世  
鬼神與通君其奚憾不余鑑衷

平淮夸雅

柳宗元

皇者其武于澱于淮旣巾乃車環蔡其來校衆昏囂  
甚毒于醒狂奔叫喚以干大刑皇咨于度唯汝一德  
曠誅四紀其後汝克錫汝斧鉞其往視師師是蔡人  
以宥以釐度拜稽首廟于元龜旣禡旣類于社是空  
金節煌煌錫盾雕戈犀甲熊旂威命是荷度拜稽首  
出次于東天子餞之疊學是崇鼎臚俎載五獻百邊



凡百卿士班以周旋既涉于滄乃翼乃前孰圖厥猶  
其佐多賢宛宛周道于山于川遠揚邇昭陟降連連  
我旆我旗于道于陌訓于羣帥拳勇來格公曰徐之  
無恃雒雒式和爾容惟義之宅進次于郾彼昏卒狂  
哀克鞠頑鋒蝟斧塘赤子匍匐厥父是亢怒其萌芽  
以恃太陽王旅渾渾是佚是祐既獲敵師若饑得哺  
蔡兇伊窘悉起來聚左擣其虛靡愆厥慮載闢載祓  
丞相是臨弛其武刑諭我德心其危既安有長如林  
曾是謹譎化爲謳吟皇曰來歸汝復相予爵之成國  
胙以夏區度拜稽首天子聖神度拜稽首皇祐下人

淮夷既平震是朔南空廟空郊以告德音歸牛休馬  
豐穰于野我武唯皇永保無疆

衡州刺史東平呂君誄

麟死魯郊其靈不施濯濯夫子故潔其儀冠仁服義  
干櫓書詩忠貞繼佩智勇承綦跨騰商周堯舜是師  
道不勝旣天固余欺鬼神齊怒妖嬖咸疑何付之德  
而奪其時嗚呼哀哉命姓惟呂勤唐以力輔寧萬邦  
受胙爾國維師元聖周以降德世征五侯伊祖之則  
嗣濟厥武前書是式至于化光爰耀其特春秋之元  
儒者咸感君達其道卓焉孔直聖人有心由我而得



敷施變化動無不克惟理惟公舒文以翼宣于事業  
與古同極道不苟用資仕乃揚進于禮司奮藻合章  
沒科聯中休問用張署讎百氏錯綜逾光超都諫列  
屢皂其囊帝殊爾能人服其智戎悔厥禍款邊求侍  
盛選邦良難乎始使君登御史贊命承事風動海壖  
皇威以致來總征賦甲茲郎吏制用經邦時推重器  
諸臣之復周官匪易漢課牋奏鮮云能備君自他曹  
載出其枝筆削自任羣儒革議正郎司刑邦憲為貳  
糾佞肅邪諂諛具畏遷理于道民服休嘉恩疎若昵  
惕邇如遐實閉其閤而撫于家載其愉樂申以舞歌

賦無吏迫威不刑加浩然順風從令無譁繇蠶外邑  
我繭盈車雜耕鄰邦我黍之華既字其畜亦藝其麻  
馨鼓斯屏人喜其多始富中教興良廢邪老績既成  
王用興嗟陟于嶽濱言進其律號呼南竭謳謠北溢  
欺吏悍民先聲如失逋租匿役歸誠自出兼并既息  
罷羸乃逸唯昔舉善盜奔于隣今我興仁化為齊人  
惟昔富人或賑之粟今我厚生不竭而足邦思其弼  
人戴唯父善胡名炎仁胡罹咎俾民伊祐而君不壽  
矯矯貪凌乃康乃茂嗚呼哀哉廩不餘食藏無積帛  
內厚族姻外賙賓客恆是懸馨逮茲易簣僮無凶服



葬非舊陌嗚呼哀哉君昔與余講德討儒時中之奧  
希聖爲徒志存致君笑咏唐虞揭茲日月以耀羣愚  
疑生所怪怒起時殊齒舌噉噉雷動風驅良辰不偶  
卒與禍俱直道莫試嘉言罔敷佐王之器竊以郡符  
秩在三品空謚王都諸生羣吏尚擁良圖故友咨懷  
累行陳謦是旌是告永永不渝嗚呼哀哉

補樂歌

皮日休

麟之儀儀不繫不維樂德而至如賓之嬉鳳之愉愉  
不箝不斂樂德而至如賓之娛自筐及筥我有牢醕  
自筐及筥我有貨幣我牢不愆我貨不匱碩碩其才

有樂而止

洪源誰孕疏爲江河大塊孰延播爲山阿厥流浩漾  
厥勢嵯峨今君之酌慰我實多

心箴

范浚

茫茫堪輿俯仰無垠人於其間眇然有身是身之微  
太倉稊米參爲三才曰惟心爾往古來今孰無此心  
心爲形役乃獸乃禽唯口耳目手足動靜投間抵隙  
爲厥心病一心之微衆欲攻之其餘存者嗚呼幾希  
君子存誠克念克敬天君泰然百體從令

敬齋箴

朱文公



言宗  
正其衣冠尊其瞻視潛心以居對越上帝足容必重  
手容必恭擇地而蹈折旋蟻封出門如賓承事如祭  
戰戰兢兢罔敢或易守口如瓶防意如城洞洞屬屬  
罔敢或輕不東以西不南以北當事而存靡他其適  
弗貳以二弗參以三唯心唯一萬變是監從事於斯  
是曰持敬動靜無違表裏交正須臾有間私欲萬端  
不火而熱不冰而寒毫釐有差天壤易處三綱既淪  
九法亦斁於乎小子念哉敬哉墨卿司戒敢告靈臺

詩宗子集卷二



